

नमो नमो निम्मलदंसणस्स

पू. आनंद-क्षमा-ललित-सुशील-सुधर्मसागर गुरुभ्यो नमः

१०

पण्हावागरणं-दसमं

मुनि दीपरत्नसागर

Date : / / 2012

Jain Aagam Online Series-10

१ गंथाणुककमो

कमंको	अज्झयणं	सुत्तं	गाहा	अणुककमो	पिट्ठंको
सुयक्खंधो-१					
१	पढमं अज्झयणं-पढमं आसवदारं	१-४	१-३	१-८	०२
२	बीअं अज्झयणं-बीअं आसवदारं	५-८	-	९-१२	०७
३	तइअं अज्झयणं-तइअं आसवदारं	९-१२	-	१३-१६	१०
४	चउत्थं अज्झयणं-चउत्थं आसवदारं	१३-१६	-	१७-२०	१५
५	पंचमं अज्झयणं-पंचमं आसवदारं	१७-२०	४-८	२१-२९	१९
सुयक्खंधो-२					
१	छट्ठं अज्झयणं-पढमं संवरदारं	२१-२३	९-११	३०-३५	२१
२	सत्तमं अज्झयणं-बीयं संवरदारं	२४-२५	-	३६-३७	२३
३	अट्ठमं अज्झयणं-तइयं संवरदारं	२६-	-	३८-	२४
४	नवमं अज्झयणं-चउत्थं संवरदारं	२७-	१२-१४	३९-४३	२७
५	दसमं अज्झयणं-पंचमं संवरदारं	२८-३०	-	४४-४७	२९

१ पण्हावागरणं-दसमं अंगसुत्तं

◦ पढमो सुयकखंधो ◦

[१] पढमं अज्झयणं/पढमं आसवदारं [१]

[१] जंबू! तेणं कालेणं तेणं समएणं चंपा नामं नयरी होत्था, पुण्णभद्वे चेइए वणसंडे असोगवरपायवे पुढविसिलापट्टए, तत्थ णं चंपाए नयरीए कोणिए नामं राया होत्था, धारिणी,

देवी तेणं कालेणं तेणं समएणं समणस्स भगवओ महावीरस्स अंतेवासी अज्जसुहम्मं नामं थेरे- जाइसंपन्ने कुलसंपन्ने बलसंपन्ने रूवसंपन्ने विनयसंपन्ने नाणसंपन्ने दंसणसंपन्ने चरित्तसंपन्ने लज्जासंपन्ने लाघवसंपन्ने ओयसी तेयंसी वच्चंसी जसंसी जियकोहे जियमाणे जियमाए जियलोभे जियनिद्वे जिइंदिए जियपरीसहे जिवियास-मरण-भय-विप्पमुक्के तवप्पहाणे गुणप्पहाणे करणप्पहाणे चरण-प्पहाणे निच्छयप्पहाणे अज्ज-वप्पहाणे मद्दवप्पहाणे लाघवप्पहाणे खंतिप्पहाणे गुत्तिप्पहाणे मुत्तिप्पहाणे मंतप्पहाणे बंभप्पहाणे वयप्पहाणे नयप्पहाणे नियमप्पहाणे सच्चप्पहाणे सोयप्पहाणे नाणप्पहाणे दंसणप्पहाणे चरित्तप्पहाणे चोदसपुव्वी चउनाणोवगए पंचहिं अणगारसएहिं सद्धिं संपरिवुडे पुव्वाणुपुत्विं चरमाणे गामाणुगामं दूइज्जमाणे जेणेव चंपा नगरी तेणेव उवागच्छइ जाव अहापडिरूवं उग्गहं उग्गिण्हित्ता संजमेणं तवसा अप्पाणं भावेमाणे विहरति । परिसा निग्गया, धम्मो कहिओ, जामेव दिसिं पाउब्भूया तामेव दिसिं पडिगया ।

तेणं कालेणं तेणं समएणं अज्जसुहम्मस्स थेरस्स अंतेवासी अज्जजंबू नामं अणगारे कासव गोत्तेणं सत्तुस्सेहे जाव संखित्त-विपुलतेयलेस्से अज्जसुहम्मस्स थेरस्स अदूरसामंते उड्डंजाणू जाव संजमेणं तवसा अप्पाणं भावेमाणे विहरइ ।

तए णं सेअज्जजंबू जायसड्ढे जायसंसए जायकोउहल्ले उप्पण्णसड्ढे संजायसड्ढे समु-प्पन्नसड्ढे उट्ठाए उट्ठेइ उट्ठेत्ता जेणेव अज्जसुहम्मं थेरे तेणेव उवागच्छइ उवागच्छित्ता अज्जसुहम्मं थेरे तिक्खुत्तो आयाहिण-पयाहिणं करेइ करेत्ता वंदइ नमंसइ वंदित्ता नमंसित्ता नच्चासन्ने नाइदूरे विणएणं पंजलिपुडे पज्जुवासमाणे एवं वयासी-

जइ णं भंते समणेणं भगवया महावीरेणं जाव संपत्तेणं नवमस्स अंगस्स अनुत्तरोववाइ-यदसाणं अयमट्ठे पन्नत्ते दसमस्स णं अंगस्स पण्हावागरणाणं समणेणं जाव संपत्तेणं के अट्ठे पन्नत्ते? जंबू! दसमस्स अंगस्स समणेणं जाव संपत्तेणं दो सुयकखंधा पन्नत्ता अण्हयदारा य संवरदारा य ।

पढमस्स णं भंते! सुयकखंधस्स समणेणं जाव संपत्तेणं कइ अज्झयणा पन्नत्ता? जंबू! पढमस्स णं सुयकखंधस्स समणेणं जाव संपत्तेणं पंच अज्झयणा पन्नत्ता, दोच्चस्स णं भंते! एवं चेव, एसि णं भंते अण्हय-संवराणं समणेणं जाव संपत्तेणं के अट्ठे पन्नत्ते? ततेणं अज्जसुहम्मं थेरे जंबूनामेणं अणगारेणं एवं वुत्ते समाणे जंबूअणगारं एवं वयासी-

[२] इणमो अण्हय-संवर-विणिच्छय पवयणस्स निस्संदं ।

वोच्छामि निच्छायत्थं सुहासियत्थं महेसीहिं ॥

[३] पंचविहो पन्नत्तो जिणेहिं इह अण्हओ अणादीओ ।

हिंसा-मोसमदत्तं अब्बंभ-परिग्गहं चेव ॥

[४] जारिसओ जंनामा जह य कओ जारिसं फलं देति ।

जेवि य करेंति पावा पाणवहं-तं निसामेह ॥

[५] पाणवहो नाम एस निच्चं जिणेहिं भणिओ-पावो चंडो रुद्धो खुद्धो साहसिओ अणारिओ निग्घिणो निस्संसो महब्भओ पइभओ अतिभओ बीहणओ तासणओ अणज्जो उव्वेयणओ य निरवयक्खो निद्धम्मो निप्पिवासो निक्कलुणो निरय-वास-गमण-निधणो मोह-महब्भय-पवड्ढओ मरणावेमणंसो पढमं अधम्मदारं ।

[६] तस्स य नामाणि इमाणि गोण्णाणि होंति तीसं तं, जहा- १-पाणवहं, उम्मूलणा सरीराओ, अवीसंभो, हिंसविहिंसा, तहा अकिच्चं य ६-घायणा, मारणा य, वहणा, उद्धवणा, तिवायणा य ११-आरंभ-समारंभो, आउयकम्मस्स उवद्धवो भय-निद्धवण-गालणा य संवट्ठग-संखेवो, मच्चू, असंजमो, कडग-मद्धणं १६-वोरमणं, परभव-संकायकारओ, दुग्गतिप्पवाओ, पावकोवो य, पावलोभो २१-छविच्छेओ, जीवियंतकरणो, भयंकरो, अणकरो, वज्जो २६-परितावण-अण्हओ, विणासो, निज्जवणा, लुंपणा, गुणाणं विराहणत्ति; अवि य तस्स एवमादीणि नामधेज्जाणि होंति तीसं पाणवहस्स कलुसस्स कडुयफल-देसगाइं ।

[७] तं च पुण करेंति केई पावा असंजया अविरया अणिहुय-परिणाम-दुप्पयोगी पाणवहं भयंकरं बहुविहं परदुखुप्पायणप्पसत्ता इमेहिं तसथावरेहिं जीवेहिं पडिणिविद्धा किं ते?, पाढीण-तिमि-तिमिगिल-अणेगझस-विविहजातिमंदुक्क-दुविहकच्छभ-नक्कमगर-दुविहगाह-दिलि-वेढय-मंदुय-सीमागार-पुलुय-सुंसुमार-बहुप्पगारा जलयरविहाणाकते य एवमादी, कुरंग-रू-सरभ-चमर-संबर-हुरब्भ-ससय-पसय-गोण-रोहिय-हय-गय-खर-करभ-खग्ग-वानर-गवय-विग-सियाल-कोल-मज्जार-कोलसुणक-सिरियंदलय-आवत्त-कोकंतिय-गोकण्ण-मिय-महिस-वियग्ध-छगल-दीविय-साण-तरच्छ-अच्छ-भल्ल-सडुल-सीह-चिला चउप्पयविहाणाकए य एवमादी, अयगर-गोणस-वराहि-मउलि-काओदर-दब्भपुप्फ-आसालिय-महोरगा उरग-विहाणाकए य एवमादी, छीरल-सरंब-सेह-सल्लग-गोधा-उंदुर-नउल-सरड-जाहग-मुगुंस-खाडहिल-वाउप्पइय-घरोलिया सिरीसिवग्गे य एवमादी, कादंबक-बक-बलाका-सारस-आडासेतीय-कुलल-बंजुल-पारिप्पव-कीव-सउण-दीविय-हंस-घत्तरट्ठ-भास-कुलीकोस-कोंच-दगतुंड-ढेणियालगसूर्डमुह-कविल-पिंगलक्खग-कारंडग-चक्कवाग-उक्कोस-गरुल-पिंगुल-सुय-बरहिण-मयण-साल-नंदीमुह-नंद-माणगकोरंग-भिंंगारग-कोणालग-जीवंजीवक-तित्तिर-वट्ठक-लावक-कंपिजलक-कवोतग-पारेवग-चिडिग-ढिंक-कुक्कुड-वेसर-मयूरग-चउरग-हरपोंडरीय-सालग-वीरल्ल-सेण-वायस-विहंगभेणासि-चास-वगुलि-चम्मट्ठिल-विततपक्खी खहयरविहाणकते य एवमादी जल-थल-खद-चारिणो उ पंचिंदिए पसुगणे बिय-तिय-चउरिंदिए य विविहे जीवे पियजीविए मरणदुक्खपडिक्के वराए हणंति बहुसंकिलिद्धकम्मा ।

इमेहिं विविहेहिं कारणेहिं, किं ते? चम्म-वसा-मंस-मेय-सोणिय-जग-फिप्फिस-मत्थुलिंगिह-यय-अंत-पित्त-पोप्फस-दंतट्ठाअट्ठि-मिंज-नह-नयण-कण्ण-ण्हारुणि-नक्क-धमणि-सिंग-दाढि-पिच्छा-विस-

विसाण-वालहेउं, हिंसंति य भमर-मधुकरिगणे रसेसु गिद्धा तहेव तेइंदिए सरीरोवकरणइयाए किवणे बेइं-दिए बहवे वत्थोहरपिमंडप्पद्वा अण्णेहि य एवमाइएहिं बहूहिं कारणसतेहिं अबुहा इह हिंसंति तसे पाणे इ-सुयक्खंधो-१, अज्झयणं-१

मे य एगिंदिए वराए तसे य अण्णे तदस्सिए चेव तणुसरीरे समारंभंति-अत्ताणे असरणे अनाहे अबंधवे कम्म-निगल बद्धे अकुसलपरिणाम-मंदबुद्धिजण-दुव्विजाणाए पुढविमए पुढविसंसिए जलमए जलगए अण-लाणिल-तणवणस्सतिगणनिस्सिए य तम्मय-तज्जिए चेव तदाहारे तप्परिणत-वण्ण-गंध-रस-फास-बौदिरूवे अचक्खुसे चक्खुसे य तसकाइए असंखे थावरकाए य सुहुम-बायर-पत्तेयसरीर-नाम-साधारणे अणंते हणंति अविजाणओ य परिजाणओ य जीवे इमेहिं विविहेहिं कारणेहिं किं ते?,

करिसण-पोक्खरणी-वावि-वप्पिण-कूव-सरतलाग-चित्ति-वेदि-खातिय-आराम-विहार-थूभ-पागार-दार-गोउर-अट्टालग-चरिय-सेतु-संकम-पासायविकप्प-भवण-घर-सरण-लेण-आवण-चेतिय-देवकुल-चित्तसभ-पव-आयत्तण-आव-सह-भूमिघर-मंडवाण य कए भायण-भंडोवगरणस्स विविहस्स य अट्टाए पुढविं हिंसंति मंदबुद्धिया जलं ज मज्जयण-पाण-भोयण-वत्थधोवण-सोयमादिएहिं पयण-पयावण-जलावण-विंदसणेहि अगणिं सुप्प-वियण-तालयंट-पेहुण-मुह-करयल-सागपत्त वत्थमादिएहिं अनिलं अगार-परियार-भक्ख-भोयण-सयण-आसण-फलग-मुसल-उक्खल-तत-वितत-आतोज्ज-वहण-वाहण-मंडब-विविहभवण-तोरण-विडंग-देवकुल-जालय-अद्ध-चंद-निज्जग-चंदसालिय-वेतिय-निस्सेमि-दोणि-चंगेरि-खील-मेढक-सभ-प्पवआवसह गंध-मल्ल-अनुलेव-अंबर-जुय-नंगल-मइय-कुलिय-संदण-सीया-रह-सगड-जाण-जोग्ग-अट्टाल-ग-चरिएअ-दार-गोपुर-फलिह-जंत-सूलिय-लउडमु-सुंढि-सतग्घि-बहुपहरण-आवरण-उवक्खराण कते,

अण्णेहि य एवमाहिएहिं बहूहिं कारण-सतेहिं हिंसति ते तरुणणे भणियाभणिए य एवमादी सत्ते सत्तपरिवज्जिया उवणंति दढमूढा दारुणमती कोहा माणा माया लोभा हस्स रती अरती सोय वेदत्थ-जीव-धम्म-अत्थ-कामहेउं सवसा अवसा अट्टा अमट्टाए य तसपाणे थावरे य हिंसंति मंदबुद्धी सवसा हणंति अवसा हणंति सवसा अवसा दुहओ हणंति अट्टा हणंति अणट्टा हणंति अट्टा अमट्टा दुहओ हणंति हस्सा हणंति वेरा हणंति रतीए हणंति हस्सा वेरा रतीए हणंति कुद्धा हणंति लुद्धा हणंति मुद्धा हणंति कुद्धा लुद्धा मुद्धा हणंति अत्था हणंति धम्मा हणंति कामा हणंति अत्था धम्मा कामा हणंति ।

[८] कयरे ते?, जे सोयरिया मच्छबंधा साउणिया वाहा कूरकम्मा दीवितबंधप्पओग-तप्प-गल-जाल-वीरल्लग-आयसीदब्भवग्गुरा-कूडछेलिहत्था हरिएसा ऊणिया य वीदंसग-पासहत्था वणचरगा लुद्धगा य महुघात-पोतघाया एणीयारा पएणीयारा सर-दह-दीहिअ-तलाग-पल्लल-परिगालण-मलण-सोत्तबंधण-ससिलासयसोसगा बिस-गरलस्स य दायगा उत्तण-वल्लर-वग्गिणिद्वय-पलीवका कूरकम्मकारी इमे य बहवे मिलक्खुया के ते-सक जवण सवर बब्बर काय मुरुंड उड्ड भडग निण्णग पक्काणिय कुलक्ख गोड सीहल पारस कौंच अंध दबिल पुलिंद आरोस डोंब पोक्कण गंधहारग बहलीय जल्ल रोम मास बउस मलया य चुंचुया य चूलिया कौकणगा मेद पल्हव मालव मग्गर आभासिया अमक्क चीणल्हासिय खस खासिय नेद्ध मरहट्ट मुट्ठिय आरब डोंबिलग कुहण केकय हूण रोमग रू रू मरुगा चिलायविसयवासी य पावमतिणो जलयर-थलयर-सणहपय-उरगखहचर-संडासतोंड-जीवोवघायजीवी सण्णी य असण्णिणो य पज्जत्ता असुभलेस्सपरिणामा एते ण्णे य एवमादी करंति पाणातिवाय-करणं पावा पावा-भिगमा पावरूई पाणवहकयरती पाणवहरूवाणुट्टाणा पाणवहकहासु अभिरमंता तुट्टा पावं करेत्तु हौंति य बहुप्पगारं

तस्स य पावस्स फलविवागं अयाणमाणा वड्ढेति-महब्भयं अविस्साम-वेयणं दीहकालबहु-
दुक्ख-संकडं नरय-तिरिक्ख-जोणिं इओ आउक्खए चुया असुभकम्मबहुला उववज्जंति नरएसु हुलितं-महा-
सुयक्खंधो-१, अज्झयणं-१

लएसु वयरामय-कुड्ड-रूढ-निस्संधि-दारविरहिय-निम्मद्व-भूमितल-खरामस्स-विसम-निरयघर-चारएसु महो-
सिण-सयावतत्त-दुग्गंध-विस्स-उव्वेयणगेसु बीभच्छ-दरिसणिज्जेसु निच्चं हिमपडलसीयलेसु कालोभासेसु य
भीम-गंभीर-लोमहरिसणेसु निरभिरामेसु निप्पडियार-बाहि-रोग-जरा-पीलिएसु अतीवनिच्चंधकार-तिमिसेसु
पतिभएसु ववगय-गह-चंद-सूर-नक्खत्त-जोइसेसु मेयवसामंपडल-पुच्चड-पूयरुहिरुक्किण-विलीण-चिक्कण-
रसियावावण-कुहियचिक्खल्लकद्धमेसु कुकूलानल-पलित्त-जाल-मुम्मुर-असिक्खुरकरवत्तधार-सुनिसितविच्छु-
यडंकनिवातोवम्म-फरिस-अतिदुस्सहेसु अत्ताणसरण-कडुयदुक्खपरितावणेसु अनुबद्ध-निरंतरवेयणेसु जमपुरि-
ससंकुलेसु तत्थ य अंतोमुहुत्तलद्धि भवपच्चएणं निव्वत्तेति य ते सरीरं हुंडं बीभच्छदरिसणिज्जं बीहणगं
अट्ठिणहारु-नहरोमवज्जियं असुभगंध-दुक्खविसहं ततो य पज्जत्तिमुवगया इंदिएहिं पंचहिं वेदंति असुभाए
वेयणाए उज्जल-बल-विउल-उक्कड-खर-फरुस-पयंड-घोर-बीहणग-दारुणाए किं ते?

कंदुमहाकुंभियपयण-पउलण-तवगतलणभट्ठभज्जणाणि य लोहकडाहकढणाणि य कोट्ट-
बलिकरण-कोट्टणाणि य सामलिति-क्खग्ग-लोहकंटक-अभिसरणापसरणाणि फालण-विदालणाणि य अव-
कोडकबंधणाणि य लट्ठिसयतालणाणि य गलगबलुल्लंबणाणि य सूलग्गभेयणाणि य आएसपवंचणाणि
खिंसणवि-माणणाणि य विघुट्ठपणिज्ज-णाणि वज्झसयमातिकाणि य एवं ते ।

पुव्वकम्मकयसंचयोवतत्ता निरयग्गि-महग्गिसंपलित्ता गाढदुक्खं महब्भयं कक्कसं असायं
सारीरं माणसं च तिव्वं दुविहं वेदंति वेयणं पावकम्मकारी बहूणि पलिओवम-सागरोवमाणि कलुणं पालेंति
ते अहाउं जमकाइय तासिता य सद्धं करेंति भीया किं ते?,

अविभाय-सामि-भाय-वप्प-ताय जियवं मुय मे मरामि दुब्बलो वाहिपी-लिओहं किं
दाणिऽसि? एवं दारुणे णिद्धओ य मा देहि मे पहारे उस्सासेतं मुहुत्तयं मे देहिं पसायं करेहि मा रूस्स
वीसमामि गेविज्जं मुयह मे मरामि, गाढं तण्हाइओ अहं देहि पाणीयं ता हंत पिय इमं जलं विमलं सीयलं
ति धेत्तूण य नरयपाला तवियं तउयं से देंति कलसेणं अंजलीसु दट्ठूण य तं पवेवियंगमंगा असुपगलंतप-
प्पुयच्छा छिण्णा तण्हा इयम्ह कलुणाणि जंपमाणा विप्पेक्खंता दिसोदिसं अत्ताणा असरणा अणाहा अबं-
धवा बंधुविप्पहूणा विपलायंति य मिगा व वेगेण भयुव्विग्गा धेत्तूण बाला पलायमाणाणं निरणुकंपा मुहं
विहाडेत्तु लोहडंडेहिं कलकलं ण्हं वयणंसि छुभंति केइ जमकाइया हसंता, तेण दड्ढा संतो रसंति य भीमाइं
विस्सराइं रुदंति य कलुणगाइं पारेवतगा व एवं परवितविलाव-कलुणो कंदिय-बहुरुन्न-रुदियसद्धो परिवेविय-
रुद्ध-बद्धकारव-संकुलो नीसद्धो रसिय-भणिय-कुविय-उक्कूइय-निरयपालतज्जिय गेण्हक्कम पहर छिंद भिंद
उप्पाडेहि उक्खणाहि कत्ताहि विकत्ताहि य भंज हण विहण विच्छुभोच्छुभ आकड्ढ विकड्ढ किं ण
जंपसि?

सराहि पावकम्माइं दुक्कयाइं-एवं वयणमहप्पगब्भो पडिसुयासद्ध-संकुलो तासओ सया
निरयगोयराण महानगर-डज्झमाण-सरिसो निग्गोसे सुच्चए अणिट्ठो तहियं नेरइयाणं जाइज्जंताणं जाय-
णाहिं किं ते? असिवणदब्भवणजंत-पत्थरसूइतलखारवाविकलकल्लं तवेयरणिकलंबवालुयाजलियगुह-निरुंभण-
उसिणोसिणकंडइल्लदुग्गमरहजोय-णतत्तलोहपहगमणवाहणाणि इमेहिं विवि-हेहिं आयुहेहिं किं ते-मोग्गर
मुसुंढि करकच सत्ति हल गय मुसल चक्क कौत तोमर सूल लउल भिंडिमाल सव्वल पट्टिस चम्मेट्ट दुहण

मुद्विय असिखेडग खग्ग चाव नाराय कणक कप्पणि वासि परसु टंकतिकख निम्मल अण्णेहि य एवमादिएहिं असुभेहिं वेउच्चिएहिं पहरणसतेहिं अनुबद्ध-तिव्वेरा परोप्परं वेयणं उदीरेंति अभिह-णंता तत्थ य मोगगरपहारचुण्णिय-मुसुंढिसंभग्गमहितदेहा जंतोपीलण-फुरंत-कप्पिया केइत्थ सचम्मका विगत्ता निम्मू-सुयक्खंधो-१, अज्झयणं-१

लुल्लूण-कण्णोद्वणा-सिका छिण्णहत्थपादा असिकरकय-तिकखकौत-परसु-प्पहारफालिया वासीसंतच्छि-तंगमंगा कलकलखार-परिसित्त-गाढ-डज्झंतगत्ता कुंतग्गभिण्ण-जज्जरिय-सव्वदेहा विलोलंति महीतले विसूणियंगमंगा,

तत्थ य विग-सुणग-सियाल-काक-मज्जार-सरभ-दीविय वियग्ध-सदूल-सीह-दप्पिय-खुहाभि-भूतेहिं निज्जकालमण-सिएहिं धोरा-रसमाणभीमरूवेहिं अक्कमित्ता दढदाढागाढडक्ककड्ढिय-सुतिकखनह-फालियउद्धेदेहा विच्छिप्पंते समंतओ विमुक्कसंधिबंधणा वियंगिमंगा कंक-कुरर-गिद्धा घोरकड्ढवायसगणेहि य पुणो खरथिरदढणक्ख-लोहतुंडेहिं ओवतित्ता पक्खाहय-तिकखनक्खविक्खित्तजिब्भ-अंछियनयण-निद्वयो-लुग्ग-विगतवयणा उक्कोसंता य उप्पयंता निपतंता भमंता पुव्वकम्मोद-योवगता पच्छाणु-सएण डज्झ-माणा णिंदंता पुरेकडाइं कम्माइं पावगाइं तहिं-तहिं तारि-साणि ओसण्णचिक्कणाइं दुक्खाइं अनुभवित्ता ततो य आउ-क्खएणं उववट्ठिया समाणा बहवे गच्छंति तिरियवसहिं-दुक्खुत्तारं सुदारुणं जम्मण-मरण-जरा-वाहि-परियट्ठणरहं जलथलखहचर-परोप्पर-विहिसणपवंचं इमं च जगपागडं वराका दुक्खं पावेंति दीहकालं किं ते?

सीउण्हतण्ह-खुहवेयण-अप्पडीकारअडविजम्मण-निच्चभउच्चिग्गवास-जग्गणवधबंधण-तालणं-कण-निवायण-अट्ठिभंजण नासाभेय-प्पहार-दूमण-छविच्छेयण-अभिओगपावण-कसंकुसार-निवाय-दमणाणि वाहणाणि य मायापिति विप्पयोग-सोयपरिपीलणाणि य सत्थविग्गविसाभिघाय-गलगवलाबलणमारणाणि य गलजालुच्छिंपणाणि पउलण-विकप्पणाणि य जावज्जीविगबंधणाणि पंजर-निरोहणाणि य सज्जह-निद्धडणा-णि घमणाणि दोहणाणि य कुडंड-गलबंधणाणि वाड-परिवारणाणि य पंकजलनिमज्ज-णाणि वारिप्पवेस-णाणि य ओवाय-णिभंगविसमणिवडण-दवग्गिजाल-जहणाइयाई य, एवं ते दुक्ख-सय-संपलित्ता नरगाओ आगया इहं सावसे-सकम्मा तिरिक्खपंचेंदिएसु पावेंति पावकारी कम्माणि पमाद-राग-दोस-बहुसंचियाइं अतीवअस्साय-क्ककसाइं ।

भमर-मसग-मच्छियाइएसु य जाई-कुलकोडिसयसहस्सेहिं नवहिं चउरिंदियाण तहिं-तहिं चेव जम्मण-मरणाणि अनुभवता कालं संखेज्जकं भमंति नेरइय समाणतिव्वदुक्खा फरिस-रसण-घाम-चक्खुसहिया तेव तेइंदिएसु-कुंथु-पिपीलिका-अवधिकादि-केसु य जाती-कुलकोडियसय-सहस्सेहिं अट्ठहिं अनूणएहिं तेइंदियाण तहिं-तहिं चेव जम्मण-मरणाणि अनुभवता कालं संखेज्जकं भमंति नेरइयसमाण-तिव्वदुक्खा फरिस-रसण-घाण-संपउत्ता तहेव बेइंदिएसु-गंडूलय-जलुय-किमिय-चंदणगमादिएसु य जाती-कुलको-डिसयसहस्सेहिं सत्तहिं अनूणएहिं बेइंदियाण तहिं-तहिं चेव जम्मण-मरणाणि नुहवंता कालं संखेज्जकं भमंति नेरइय समाणतिव्वदुक्खा फरिस-रसण-संपउत्ता पत्ता एगिंदियत्तणं पि य-पुढवि-जल-जलण-मारुय-वणप्फति-सुहुम-बायरं च पज्जत्तमपज्जत्तं पत्तेयसरीरनामसाहारणं च पत्तेयसरी-रजीविएसु य तत्थवि कालमसंखेज्जकं भमंति अनंतकालं च अनंतकाए फासिंदियभाव-संपउत्ता दुक्खसमुदयं ।

इमं अणिद्वं पावेंति पुणो-पुणो तहिं-तहिं चेव परभव-तरुणगहणे कोट्टालकुत्ति-यदालण-सलिल-मलण-खुंभण-रुमंभण-अनलानिल-विविहसत्थघट्टण-परोप्पराभिहणण-मारणवि-राहणाणि य अकाम-

काइं परप्पओगोदीरणाहि य कज्जप्पओयणेहि य पेस्सपसु-निमित्तं ओसहाहार-माइएहिं उक्खणण-उक्क-
त्थण-पयण-कोट्टण-पीसण-पिट्ठण-भज्जण-गालण-आमोडण-सडण-फुडण-भंजण-छेयण-तच्छण-विलुंचण-
पत्तज्झोडण-अग्गिदहणाइ-यातिं एवं ते भवपरंपरादुक्ख-समणुबद्धा अडंति संसार-बीहणकरे जीवा पाणाइवा-
सुयक्खंधो-१, अज्झयणं-१

यनिरया अनंतकालं जेवि य इह माणुसत्तणं आगया कहंचि नरगाओ उव्वट्टिया अधण्णा ते वि य दीसं-ति
पायसो विकय-विगल-रूवा खुज्जा वडभा य वामणा य बहिरा काणा कुंटा य पंगुला विअला य मूका य
मम्मणा य अंधिल्लग-एगचक्खुविणि-हयसचिल्लया वाहिरोगपीलिय-अप्पाउय-सत्थवज्झ-वाला कुलक्खणु-
क्किण्णदेह-दुब्बल-कुसंधयण-कुप्पमाण-कुसंठिया कुरूवा किविणा य हीणा हीणसत्ता निच्चं सोक्खपरि-
वज्जिया असुह-दुक्ख-भागी नरगाओ उव्वट्टिया इहं सावसेसकम्मा,

एवं नरग-तिरिक्खजोणिं कुमाणुसत्तं च हिंडमाणा पांति अणंतकाइं दुक्खाइं पावकारी एसो
सो पाणवहस्स फलविवागो इहलोइओ पारलोइओ अप्पसुहओ बहुदुक्खो महब्भओ बहुरयप्पगाढो दारुणो
कक्कसो असाओ वासस-हस्सेहिं मुच्चती न य अवेदयित्ता अत्थि हु मोक्खोत्ति-एवमाहंसु नायकुलनंदणो
महप्पा जिणो उ वीरवर-नामधेज्जो कहेसी य पाणवहस्स फलविवागं एसो सो पाणवहो चंडो रूद्धो खुद्धो
अणारिओ निग्घिणो निस्संसो महब्भओ बीहणओ तासणओ अणज्जो उव्वेयणओ य निरवयक्खो निद्धम्मो
निप्पिवासो निक्कलुणो निरयवास-गमण-निधणो मोह-महब्भय-पवड्ढओ मरण वेमणसो पढमं अहम्मदारं
समत्तं त्ति बेमि ।

◦ पढमे सुयक्खंधे पढमं अज्झयणं/पढमं आसव दारं समत्तं ◦

◦ मुनि दीपरत्नसागरेण संशोधितः सम्पादितश्च पढमं अज्झयणं समत्तं ◦

[] बीअं अज्झयणं/बीअं आसवदारं []

[१] जंबू बितियं च अलियवयणं-लहुसगलहु-चवल-भणियं भयंकरं-दुहकरं-अयसकरं-वेरकरं
अरतिरति-रागदोस-मणसंकिलेस-वियरणं अलिय-नियडि-साति-जोयबहुलं नीयजण-निसेवियं निस्सं
अप्पच्चयकारकं परमसाहु-गरहणिज्जं परपीलाकारकं परमकण्हेस्ससहियं दुग्गइ-विणिवायवड्ढणं भवपु-
णब्भवकरं चिरपरिचियमणुगतं दुरंतं कित्तियं बितियं अधम्मदारं ।

[१०] तस्स य नामाणि गोण्णाणि होंति तीसं तं जहा- अलियं, सढं, अणज्जं, मायामोसो,
असंतकं, कूडकवडमवत्थुगं च, निरत्थयमवत्थुगं च, विद्देसगरहणिज्जं, अनुज्जगं, कक्कणा य, वंचणा य,
मिच्छा-पच्छाकडं च, साती, ओच्छन्नं, उक्कूलं च, अट्ठं, अब्भक्खाणं च, किब्बिसं, वलयं, गहणं च,
मम्मणं च, नूमं, नियती, अप्पच्चओ, असमओ, असच्चसंधत्तणं, विवक्खो, अवहीयं, उवहि-असुद्धं,
अवलोवो त्ति, अवि य तस्स एयाणि एवमादीणि नामधेज्जाणि होंति तीसं सावज्जस्स अलियस्स वड्ढो-
गस्स अणेगाइं ।

[११] तं च पुण वदंति केई अलियं पावा अस्संजया अविरया कवडकुडिल-कडुय-चडुल-भावा
कुद्धा लुद्धा भया य हस्सट्टिया य सक्खी चोरा चारभडा खंडरक्खा जियजूईकरा य गहिय-गहणा कक्कगुरुग-
कारगा कुलिंगीउववहिया वाणियगा य कूडतुला कूडमाणी कूडकाहावणोवजीवी पडकार-कलायकारुडज्जा
वंचणपरा चारिय-चडुयार-नगरगुत्तिया-परिचारग- दुडुवायि-सूयक-अणबलभणिया य पुव्वकालियवयणदच्छा
साहसिका लहुस्सगा असच्चा गारविया असच्चद्वा-वणाहिचित्ता उच्चच्छंदा अमिग्गहा अणियता छंदेण

मुक्कवायी भवन्ति आलियाहिं जे अविरया, अवरे नत्थिकवादिणो वामलोकवादी भणन्ति नत्थि जीवो न जाइ इह परे वा लोए न य किंचिवि फुसति पुन्नपावं नत्थि फलं सुकय-दुक्कयाणं पंचमहाभूतियं सरीरं भासन्ति हे! वातजोगजुत्तं, पंच य खंदे भणन्ति केई, मणं च मणजीविका वदन्ति, वाउ-
सुयक्खंधो-१, अज्झयणं-२

जीवोत्ति एवमाहंसु, सरीरं सादियं सनिधणं इह भवे एगे भवे तस्स विप्पणासम्मि सव्वनासोत्ति, एवं जंपन्ति मुसावादी,

तम्हा दाणव्वय-पोसहाणं तव-संजम-बंधेचर-कल्लाणमाइयाणं नत्थि फलं नवि य पाणवह-अलियवयणं न चेव चोरिक्ककरण-परदारसेवणं वा सपरिग्गह पावकम्मकरणं पि नत्थि किंचि न नेरइय-तिरिय-मणुयाण जोणी न देवलोगो वत्थि न य अत्थि सिद्धिगमणं अम्मापियरो वि नत्थि नवि अत्थि पुरिसकारो पच्चक्खाणमवि नत्थि नवि अत्थि कालमच्चू अरहंता चक्कवट्ठी बलदेव-वासुदेवा नत्थि नेवत्थि केइ रिसओ धम्माधम्मफलं च नवि अत्थि किंचि बहुयं च थोवं वा, तम्हा एवं विजाणिऊण जहा- सुबहु-इंदियाणुकूलेसु सव्वविसएसु वट्ठह नत्थि काइ किरिया वा अकिरिया वा-एवं भणन्ति नत्थिकवादिणो वामलोकवादी, इमं पि बिइयं कुंदसणं असब्भाववाइणो पण्णवेंति मूढा-संभूतो अंडकाओ लोको सयंभुणा सयं च निम्मिओ, एवं एतं अलियं पयावइणा इस्सरेण य कयन्ति केई एवं विण्हुमयं कसिणमेव य जगं ति केई, एवमेके वदन्ति मोसं-एको आया अकारको वेदको य सुकयस्स दुक्कयस्स य करणाणि कारणाणि सव्वहा सव्वहिं च निच्चो य निक्किओ निग्गुणो य अनुवलेवओत्ति वि य एवमाहंसु असब्भाव-

जंपि इहं किंचि जीवलोके दीसइ सुकयं वा दुक्कयं वा एयं जदिच्छाए वा सहवेण वावि दइवतप्पभावओ वावि भवति नत्थेत्थ किंचि कयकं तत्तं लक्खण-विहाम नियती य कारिया-एवं केइ जंपन्ति इइडिरससातगारवपरा बहवे करणालसा परूवेंति धम्मवीमंसएणं मोसं अवरे अहम्माओ रायदुइं अब्भक्खाणं भणन्ति अलियं-चोरोत्ति अचोरियं करेंतं डामरिओत्ति वि य एमेव उदासीणं दुस्सीलोत्ति य परदारं गच्छतित्ति मइलित्ति सीलकलियं अयंपि गुरुत्तप्पओत्ति, अण्णे एवमेव भणन्ति उवहणंता मित्तकलत्ताइं सेवन्ति अयंपि लुत्तधम्मो इमो वि वीसंभधायओ पावकम्मकारी अकम्मकारी अगम्मगामी अयं दुरप्पा बहुएसु य पातगेसु जुत्तोत्ति-एवं जंपन्ति मच्छरी, भद्दके व गुम-कित्ति-नेह-परलोग-निप्पिवासा ।

एवं ते अलियवयणदच्छा परदोसुप्पायणप्पसत्ता वेदेंति अक्खाइय-बीएण अप्पाणं कम्मबंध-णेण मुहरी असमिक्खियप्पलावी निक्खेवे अवहरन्ति परस्स अत्थंमि गढियगिद्धा अभिजुजंति य परं असंतएहिं लुद्धा य करेंति कूडसक्खित्तणं असच्चा अत्थालियं च कन्नालियं च भोमालियं च तथा गवालियं च गरुयंभणन्ति अहरगतिगमणं, अण्णंपि य जाति-रूव-कुल-सील-पच्चय-मायाणिगुणं चवला पिसुमं परम-इभेदकं असंतकं विद्देसमणत्थकारकं पावकम्ममूलं दुद्धिदं दुस्सुयं अमुणियं निल्लज्जं लोकगरहणिज्जं वह-बंध-परिकि-लेस-बहुलं जरा-मरण-दुक्खसोयनेम्मं असुद्ध-परिणाम-संकिलिदं भणन्ति अलिया हिसन्ति-निविद्धा असंतगुणुदीरका य संतगुणनासका य हिंसाभूतोवघातितं अलियसंपउत्ता वयणं सावज्जमकुसलं साहुगरहणिज्जं अधम्मजणणं भणन्ति अणभिगत-पुन्नपावा पुणो य अधिकरण-किरिया-पवत्तगा बहुविहं अनत्थं अवमदं अप्पणो परस्स य करेंति,

एमेव जंपमाणा महिससूकरे य साहेंति घायगाणं ससय-पसय-रोहिए य साहेंति वागुरीणं तित्तिर-वट्ठक-लावके य कविंजल-कवोयके य साहेंति झसमगर-कच्छभेय साहेंति मच्छियाणं संखंके-

खुल्लए य साहिति मगराणं अयगर-गोणस-मंडलि-दव्वीकर-मउली य साहिति बालवीणं गोहासेहा य सल्लग-सरडे य साहिति लुद्धगाणं गयकुल-वानरकुले य साहिति पासियाणं सुक-बरहिण-मयणसाल-कोइल-हंसकुले सारसे य साहिति झसमगर-कच्छभेय साहिति मच्छियाणं संखंकेखुल्लए य साहिति पोसगाणं वध-बंध-जायणं च साहिति गोम्मियाणं धण-धन्न-गवेलए य साहिति तक्कराणं गाम-नगर-पट्टणे य साहिति सुयक्खंधो-१, अज्झयणं-२

चारियाणं पारघाइय-पंथघातियाओ साहिति य गंठियभेयाणं कयं च चोरियं नगरगोत्तियाणं लंछण-निल्लंछण-धमण-दुहण-पोसण-वणण-दुमण-वाहणादियाइं साहिति बहूणि गोमियाणं धातु-मणि-सिलप्पवाल-रयणागरे य साहिति आगरीणं पुप्फविहिं फलविहिं च साहिति मालियाणं अग्धमहुकोसए य साहिति वणचराणं जंताइं विसाइं मूलकम्मं आहेवण-आविंधण आभिओगमंतोसहिप्पओगे चोरिय-परदारगमण-बहुपावकम्मकरणं ओखंधे गामघातियाओ वणदहण-तलागभेयणाणि बुद्धि-विसय-विणासणाणि वसीकरण-मादियाइं भयमरण-किलेस-दोसजणणाणि भाव-बहुसंकिलिद्ध-मलिणाणि भूतघातो-वघायाइं-सच्चाणि वि ताइं हिंसकाइं वयणाइं उदाहरंति-

पुट्टा व अपुट्टा वा परतत्तिवावडा य असमिक्खिय-भासिणो उवदिसंति सहसाउट्टा गोणा गवया दमंतु परिणयवया अस्सा हत्थी गवेलग-कुक्कुडा य किज्जंतु किणावेध य विक्केह पयह सयणस्स देह पिय धय दासि-दास-भयक-भाइल्लका य सिस्सा य पेसकजणो-कम्मकराकिंकराय एए सयण-परिजणो य कीस अच्छंति भारिया भे करेत्तु कम्मं गहणाइं वणाइं खेत्त-खिलभूमि-वल्लराइं उत्तण-धण-संकडाइ डज्जंतु सूडिज्जंतु य रुक्खा भिज्जंतु जंतभंडाइयस्स उवहिस्स कारणाए बहुविहस्स य अट्टाए उच्छू दुज्जंतु पीलियंतु य तिला पयावेह य इट्टकाओ घरट्टायाए च्छेत्ताइं कसह कलसावेह य लहुं गाम-नगर-खेड-कब्बडे निवेसेह अडवीदेसेसु विपुलसीमे पुप्फाणि य फलाणि य कंदमूलाइं कालपत्ताइं गेण्हह करेह संचयं परिजणट्टयाए साली वीही जवा य लुच्चंतु मलिज्जंतु उप्प-णिज्जंतु य लहुं च पविसंतु य कोट्टा-गारं अप्पमहुक्कोसगा य हम्मंतु पोयसत्था सेणा निज्जाउ जाउ डमरं घोरा वट्टंतु य संगामा पवहंतु य सगड-वहणाइं उवणयणं चोलगं विवाहो जन्नो अमुगम्मि होउ दिवसेसुकरणेसु मुहुत्तेसु नक्खत्तेसु तिहिम्मि य अज्ज होउ ण्हवणं मुदितं बहुखज्जपेज्जकलियं कोउकं विण्हावणकं संतिकम्माणि कुण्ह ससि-रवि-गहोवराग-विसमेसु सज्जण-परियणस्स य नियकस्स य जीवियस्स परिरक्खणट्टयाए पडिसीसकाइं च देह देह य सीसोवहारे विविहोसहि-मज्ज-मंस-भक्खण्णपाण-मल्लाणुलेवण-पईवजलिउज्जलसुगंधधूवावकार-पुप्फफल-समिद्धे पायच्छित्ते करेह पाणाइवायकरणेणं बहुविहेणं विवरीयुप्पाय-दुस्सिमिण-पावसउण-असोमग्गहचरिय-अमंगलनिमित्त-पडिघायहेउं वित्तिच्छेयं करेह मा देह किंचि दाणं सुट्टहओ-सुट्टहओ सुट्टछिण्णो भिण्णोत्ति उवदिसंता एवं विविहं करंति अलियं मणेणं वायाए कम्मुणा य अकुसला अणज्जा अलियाणा अलियधम्मनिरया अलियासु कहासु अभिरमंता तुट्टा अलियं करेत्तु हांति य बहुप्पयारं ।

[१२] तस्स य अलियस्स फलविवागं अयाणमाणा वड्ढेंति महब्भयं अविस्सामवेयणं दीह-कालं बहुदुक्खसंकडं नरय-तिरिय-जोणिं तेणं य अलिएणं समणुबद्धा आइद्धा पुणब्भवंधकारे भमंति भीमे दुग्गतिवसहिमुवगया तेय दीसंतिह दुग्गगा दुरंता परव्वसा अत्थभोगपरिवज्जिया असुहिता फुडियच्छवी बीभच्छा विवन्ना खरफरुस-विरत्त-ज्झाम-ज्झुसिरा निच्छाया लल्ल विफलवाया असक्कतमसक्कया अगंधा अचेयणा दुभगा अकंता काकस्सरा हीणभिण्णघोसा विहिंसा जडबहिरंधया य मम्मणा अकंत-विकय-करणा नीया नीयजण-निसेविणो लोग-गरहणिज्जा भिच्चा असरिसजणस्स पेस्सा दुम्मेहा लोक-वेद-अज्झप्प-

समयसुतिविज्जिया नरा धम्मबुद्धि-वियला अलिण य तेणं डज्झमाणा असंतएणं अवमाणण-पट्टिमंस-अहिकखेव-पिसुणभेयण-गुरु-बंधव-सयण-मित्तवक्खारणादियाइं अब्भक्खाणाइं बहुविहाइं पावेंति अमणोरमाइं हियय-मण-दूमकाइं जावज्जीवं दुरुद्धराइं अणिद्वखरफरुसवयण-तज्जण-निब्भच्छण-दीणवदणविमणा कुभो-यणा कुवाससा कुवसहीसु किलिस्संता नेव सुहं नेव निव्वुइं उवलभंति अच्चंत-विपुल-दुक्खसय-संपलित्ता । सुयक्खंधो-१, अज्झयणं-२

एसो सो अलियवयणस्स फलविवाओ इहलोइओ पारलोइओ अप्पसुहो बहुदुक्खो महब्भओ बहुरयप्पगाढो दारुणो कक्कसो असाओ वाससहस्सेहिं मुच्चइ न य अवेदयित्ता अत्थि हु मोक्खोत्ति-एव-माहंसु नायकुलनंदणो महप्पा जिणो उ वीरवरनामधेज्जो कहेसी य अलिय-वयणस्स फलविवागं एयं तं बितियंपि अलियवयणं लहुसगलहु-चवल-भणियं भयंकर-दुहकर-अयसकर-वेरकरगं अरतिरति-रागदोस-मण-संकिलेस-वियरणं अलिय-नियडि-सादि-जोगबहुलं नीयजण-निसेवियं निस्संसं अप्पच्चयकारकं परमसाहुग-रहणिज्जं परपीलाकारकं परमकण्हलेससहियं दुग्गतिविनिवायवड्ढणं भवपुणब्भवकरं चिरपरिचियमणुगयं दुरंतं बितियं अधम्मदारं समत्तं त्ति बेमि ।

◦ पढमे सुयक्खंधे बीअं अज्झयणं/बीअं आसव दारं समत्तं ◦

◦ मुनि दीपरत्नसागरेण संशोधितः सम्पादित्तश्च बीअं अज्झयणं समत्तं ◦

□ तइयं अज्झयणं/तइयं आसवदारं □

[१३] जंबू! तइयं च अदिन्नादाणं-हर-दह-मरण-भय-कलुस-तासण-परसंतिग-भेज्जलोभूलं काल-विसम-संसियं अहोऽच्छिण्णतणह-पत्थाण-पत्थोइमइयं अकित्तिकरणं अणज्जं छिद्दमंतर-विधुर-वसण-मग्गण-उस्सव-मत्त-प्पमत्त-पसुत्त-वंचणाखिवण-घायणपर-अणिहुयपरिणामतक्क-रजणबहुमयं अकलुणं राय-पुरिसरक्खियं सया साहुगरहणिज्जं पियजण-मित्तजण-भेदविप्पीति-कारकं रागदोसबहुलं पुणो य उप्पूर-समर-संगाम-डमर-कलि-कलह-वेहकरणं दुग्गतिविणिवा-यवड्ढणं भव-पुणब्भवकरं चिरपरिचितमणुगयं दुरंतं तइयं अधम्मदारं ।

[१४] तस्स य नामाणि गोण्णाणि होंति तीसं तंजहा- चोरिक्कं, परहडं, अदत्तं, कूरिक्कं, परलाभो, असंजमो, परधणम्मिगेही, लोलिक्कं, तक्करत्तणं ति य, अवहारो, हत्थलहुत्तणं, पावकम्मकरणं, तेणिक्कं, हरण-विप्पाणासी, आदियणा, लुंण्णाधणाणं, अप्पच्चओ, ओवीलो, अक्खेवो, खेवो, विक्खेवो, कूडया, कुलमसी य, कंखा, लालप्पणपत्थणा य, आससणाय वसणं, इच्छा मुच्छा य, तणहागेही, नियडि-कम्मं, अपरच्छं त्ति अवि य, तस्स एयाणि एवमादीणि नामधेज्जाणि होंति तीसं अदिन्नादाणस्स पाव-कलिकलुस-कम्मबहुलस्स अणेगाइं ।

[१५] तं च पुणं करेंति चोरियं तक्करा परदव्वहरा छेया कयकरण-लद्धलक्खा साहसिया लहुस्सगा अतिमहिच्छ-लोभगत्था ददर-ओवीलका य गेहिया अहिमरा अणभंजका भग्गसंधिया रायदुद्ध-कारी य विसयनिच्छूढा लोकबज्झा उद्धहक-गामघाय-पुरघाय-पंथघायग-आलीवग-तित्थ-भेया लहुहत्थ-संपउत्ता जूईकरा खंडरक्ख-त्थीचोर-पुरिसचोर-संधिच्छेया य गंथिभेदग-परधण-हरण-लोमावहार-अक्केवी हडकारक-निम्मद्ग-गूढचोर-गोचोर-अस्सचोरग-दासिचोरा य एकचोरा ओकइढ-संपदायक-उच्छिपक-सत्थ-घायक-बिलकोलीकारका य निग्गाह-विप्पलुंपगा बहुविहतेणिक्कहरणबुद्धी, एते अण्णे य एवमादी परस्स दव्वाहि जे अविरया ।

विपुलबल-परिगृहा य बहवे रायाणो परधणम्मि गिद्धा चउरंग-समत्त बलमग्गा निच्छिय-
वरजोह-जुद्धसद्धिय-अहमहमिति दप्पिएहिं सेन्नेहिं संपरिवुडा पउम-सगड-बलसमग्गा निच्छिय-वरजोह-
जुद्धसद्धिय-अहमहमिति दप्पिएहिं सेन्नेहिं संपरिवुडा पउम-सगड-सूड-चक्क-सागर-गरुलवूहाइएहिं अणिएहिं
उत्थरंता अभिभूय हरंति परधणाइं अवरे रणसीसलद्धलक्खा संगामम्मि अतिवयंति सण्णद्धबद्धपरियर-उप्पी-
सुयक्खंधो-१, अज्झयणं-३

लिय-चिंधपट्ट-गहियाउहपहरणा माढि-गुड-वम्मगुडिया आविद्धजालिका कवयकं-कडइया उरसिरमुहबद्ध-
कंठतोण-माइयवरफलगरचित्त-पहकर-सरभस-खरचावकर-करंछिय-सुनिसित-सरवरिस-चडकरक-मुयंतघणचंड-
वेग-धारानिवायमग्गे अणेगधणुमंडलग-संधित-उच्छलियसत्ति-कणग-वामकरगहिय-खेडगनिम्मलनिकिद्ध-
खग्ग-पहरंतकौत-तोमर-चक्क-गया-परसु-मुसल लंगल-सूल-लउल-भिंडिमाल-सब्बल-पट्टिस-चम्मेट्ट-दुधण-
मोट्टिय-मोगगर-वरफलह-जंतपत्थर-दुहण-तोण-कुवेणी-पीढकलिए ।

ईली-पहरण-मिलिमिलिमिलंत-खिप्पंत-विज्जुज्जलविरचितसमप्प-हणतले फुडपहरणे महार-
ण-संख-भेरि-वरतूर-पउरपडु-पडहाहय-निणाय-गंभीरनंदित-पक्कुभिय-विपुलघोसे हय-गय-रह-जोह-तुरिय-
पसरित-रउद्धत-तमंधकारबहुले कातरनर-नयणहियय-वाउलकरे विलुलिय-उक्कडवर-उड-तिरीड-कुंडलोडुदामा-
डोविय-पागडपडाग-उसियज्झय-वेजयंति-चामरचलंत-छत्तंधकारगंभीरे हयहेसिय-हत्थिगुलुगुलाइय-रहघणघ-
णाइय-पाइक्कहरहराइय-अप्पोडिय-सीहनाय-छेलिय-विधुदुक्कुड-कंठकयसद्ध-भीमगज्जिए सयराहसंत-रुसंत-
कलकलरवे आसूणियवयण-रूद्ध-भीम-दसणाधरोट्ट-गाढदट्ट-सप्पहारणुज्जयकरे अमरिसवस-तिव्वरत्त-
निद्धरितच्छे वेरदिट्टि-कुद्धचेट्टिय-तिवलीकुडिलभिउडि-कयनिलाडे वधपरिणय-नरसहस्स-विककम-वियंभिय-बले
वग्गंततुरंग-रहपहाविय समरभडा-वडिय-छेय-लाघव-पहारसाधित-समूसवियवाहुजुयल-मुक्कट्ट-गास-पुक्कंत-
बोल-बहुले ।

फुरफलगा-वरणगहिय-गयवरपत्थंत-दरिय-भड-खल-परोप्रवरलग्ग-जुद्ध-गव्विय-विउसित-वरा-
सिरोसतुरियअभिमुहपहरंत-छिन्नकरिकर-वियंगित-करे अवइद्ध निसद्धभिन्न-फालिय-पगलिय-रुहिरकय-भू-
मिकद्धम-चिलिच्चिल-पहे कुच्छि-दालिय-गलंत-निभेलितंत-फुरुफुरंत-विगल-मम्महाय-विकय-गाढदिन्न-पहा-
रमुच्छित-रुलंत-विब्भल-विलावकलुणे हयजोह-भमंततुरग-उद्धममत्तकुंजर-परिसंकितजण-निवुक्कच्छिन्नधय-
भग्गरहवर-नट्टसिर-करि-कलेवराकिण्ण-पडिय-पहरणविकिण्णाभरणभूमिभागे नच्चंतकबंधपउर-भयंकरवाय-स-
परिलेंतगिद्धमंडल-भमंतच्छायंधकारगंभीरे वसु-वसुह-विकंपितव्व पच्चक्ख-पिउवणं परमरूद्ध-बीहणगं दु-
प्पवेसतरगं अभिवडंति संगामसंकडं परधणं महंता अरे पाइक्क-चोरसंघा सेणावई चोरवंदपागड्डिका य अड-
वीदेसदुग्गवासी कालहरित-रत्त-पीत-सुक्किल-अणेगसयचिंधपट्ट-बद्धा परविसए अभिहणंति लुद्धा धणस्स
कज्जे रयणागर-सागरं उम्मीसहस्स-मालाकुलाकुलविओयपोतकलकरंतकलियं पायालसहस्स-वायवसवेगसलि-
लउद्धम्ममाण-दगरय-रयंधकारं वरफेणपउरधवल-पुंलपुलसमुट्टियट्टहासं मारुयविच्छुब्भमाणपाणिय-जलमा-
लुप्पील-हुलियं अवि य समंताओ खुभिय-लुलिय-खोखुब्भमाण-पक्खलिय-चलियविपुलजलचक्कवाल-महा-
नईवेगतुरिय-आपूरमाण-गंभीरविपुलआवत्तचवल-भममाणगुप्पमाणुच्छलंत-पच्चोणियत्त-पाणिय-पधावियखर-
फरुसपयंड-वाउलियसलिलफुट्टंतवीचिकल्लोल-संकुलं ।

महामगर-मच्छकच्छम-ओहार गाह-तिमि-सुंसुमार-सावय-समाहय-समुद्धायमाणक-पूरघोरपउरं
कायरजण-हिययकंपणं घोरमारसंतं महब्भयं भयंकरं पतिभयं उत्तासणगं अणोरपारं आगासं चेव निरवलंबं
उप्पाइयपवण-धणियनोल्लिय-उवरुवरितरंगदरिय-अतिवेगवेग चक्खुपह-मुत्थरंतं कत्थइ गंभीरविपुलग-

जिजय-गुंजिय-निग्धाय-गरुयनिवतित-सुदीहनीहारि-दूरसुव्वंतगंभीर-धुगुधुगें-तसदं पडिपहरुंभंतं-जक्ख-रक्ख-सकुहंडपिसायरुसियतज्जायउवसग्गसहस्ससंकुलं बहुप्पाइयभूयं विरचितबलि-होमधूवउवचार-दिन्नरुधिरच्चा-णाकणपयत-जोगापयय-चरियं परियंतजुगंतकालक्पोवमं दुरंतं महानई-नईवइ-महाभीमदरिसणिज्जं दुरणु-चरं विसमप्पवेसं दुक्खुत्तारं दुरासयं लवणसलिलपुन्नं असिय-सिय-समूसियगेहिं दच्छतरेहिं वाहणेहिं अइव-सुयक्खंधो-१, अज्झयणं-३

इत्ता समुद्धमज्झे हणति गंतूण जणस्स पोते परदव्व-हरण-नरनिरणुकंपा निरवयक्खा ।

गामागर-नगर-खेड-कब्बड-मडंब-दोणमुह-पट्टणासम-निगम-जण-वते य धणसमिद्धे हणंति थिरहियय-छिण्णलच्चा बंदिग्गहगोग्गहे य गेण्हंति दारुणमत्तो निक्किवा नियं हणंति छिंदंति गेहसंधि निक्खित्ताणि य हरंति धणधन्नदव्वजायाणि जणवयकुलाणं निग्धिणमती परस्स दव्वाहिं जे अविरया तहेव केइ अदिन्नादाणं गवेसमाणा कालाकालेसु संचरंता चियका-पज्जलिय-सरस-दरदइड-कइडिय-कलेवरे रुहिरलित्तवयण-अक्थत-खातियपीतडाइणि-भमंतभयकरं-जंबुयखिंखियंते धूयकय-घोरसद्धे वेयालुट्टिय-निसुद्ध-कहकहंत-पहसित-बीहाणक-निरभिरामे अतिदुब्बिगंध-बीभच्छदरिसणिज्जे सुसाणे वणसुन्नघर-लेण-अंतरावण-गिरिकंदर-विस-मसावय-समाकुलासु वसहीसु किलिस्संता ।

सीतातव-सोसिय-सरीरा दइडच्छवी निरय-तिरिय-भवसंकड-क्खसंभार-वेयणिज्जामि पाव-कम्मामि संचिणंता दुल्लहभक्खन्नपाणभोयणा पिवासिया झुंझिया किलंता मस-कुणिम-कंद-मूल-जंकिचि-कयाहारा उव्विग्गा उप्पुया असरणा अइवीवासं उव्वंति वालसत-संकणिज्जं अयसकरा तक्करा भयंकरा कास हरामो त्ति अज्ज दव्वं इति सामत्तं करंति गुज्झंबहुयस्स जणस्स कज्जकरणेसु विग्घकरा मत्त-पमत्त-पसुत्त-वीसत्थ-छिद्धाती वसणब्भुदएसु हरणबुद्धी विगव्व रुहिरमहिया परित्ति नरवतिमज्जाय-मतिकंकंता सज्जण-दुगुंछिया सकम्मेहिं पावकम्मकारी असुभपरिणया य दुक्खभागी निच्चाविल-दुहमनिव्वुडमणा इहलोके चेव किलिस्संता परदववाहारा नरा वसणसयसमावण्णा ।

[१६] तहेव केइ परस्स दव्वं गवेसमाणा गहिता य हया य बद्धरुद्धा य तरितं अति धाडिया पुरवरं समप्पिया चोरग्गाह-चारभड-चाडुकराण तेहि य कप्पडप्पहार-निद्धय-आरक्खि-खर-फरुस-वयण-तज्जण-गलत्तल्ल उत्थल्लणाहिं विमणा चारगवसहिं पवेसिया निरयवसहिसरिसं तत्थवि गोम्मिकप्पहार-दूमण-निब्भच्छण-कडुयवयण-भेसणग-भयाभिभूया अक्खित्त-नियंसणा मलिण दंडिखंडवसणा उक्कोडा-लंच-पास-मग्गण-परायणेहिं गोम्मिकडेहिं विविहेहिं बंधणेहिं किं ते?,

हडिनियड-बालरज्जुय-कुदंडग-वरत्त-लोहसंकल-हत्थंदुय-वज्झपट्ट-दामक-निक्कोडणेहिं अन्नेहि य एवमादिहिं गोम्मिक-भंडोवकरणेहिं दुक्खसमुदीरणेहिं संकोडण-मोडणाहिं वज्झंति मंदपुन्ना संपुड-कवाड लोहपंजर-भूमिघर-निरोह-कूव-चारग-खीलग-जुय-चक्क-वितत-बंधण-खंभलण-उद्धचलणबंधण-विहम्माणाहि य विहेडयंता अवकोडकगाढउर-सिरबद्ध-उद्धपूरित-फुरं-तउरक-डग मोडणामेडणाहिं बद्धा य नीससंता सीसावेढ-ऊरुयाल-चप्पडगसंधिबंधण-तत्तस-लागसूइया-कोडणाणि तच्छणविमाणणाणि य खार-कडुय-तित्त-नावण-जायण-कारणसयाणि बहुयाणि पावियंता उरखोडीदिन्नगाढपेल्लण-अट्टिकसंभग्ग-संपुसुलिगा गल-कालकलोहदंड-उर-उदर-वत्थि-पट्टि-परिपीलिता मच्छंत-हियय-संचुण्णियंगमगा आणत्तीकिं-करेहिं केति अविराहिय-वेरिहिं जमपुरिस-सन्निहेहिं पहया ते तत्थ मंदपुन्ना चडवेला-वज्झपट्ट-पाराइ-छिव-कस-लत-वरत्त-वेत्त-प्पहारसयतालियंगमंगा ।

किवणा लंबंतचम्म-वण-वेयण-विमुहियमाणा धणकोट्टिम-नियल-जुयल-संकोडिय-मोडिया य कीरंति निरुच्चारं एया अण्णा य एवमादीओ वेयणाओ पावा पावेंति अदंतिंदिया वसट्ठा बहुमोहमोहिया परधणम्मि लुद्धा फासिंदियविसय-तिव्वगिद्धा हत्थिगय-रूव-सद्ध-रस-गंध-इद्धरति-महितभोग-तण्हाइया य धणतोसगा गहिया य जे नरगणा पुणरवि ते कम्मदुव्वियड्ढा उवणीया रायकिंकराणं तेसिं वधसत्थग-पाढयाणं विलउली-कारकाणं लंचसय-गेण्हगाणं कूड-कवड-माया-नियडि-आयरण-पणिहिं-वंचण-विसारयाणं सुयक्खंधो-१, अज्झयणं-३

बहुविहअलिय-सयजंप-काणं परलोकपरम्महाणं निरयगतिगामियाणं तेहिं य आणत्तं-जीयदंडा तुरियं उग्धाडिया पुरवरे सिंगाडग-तिय-चउक्क-चच्चर-चउम्मह-महापह-पहेसु ।

वेत्त-दंड-लउड-कट्ठ-लेट्ठ-पत्थर-पणालि-पणोल्लि-मुट्ठि-लया-पाद-पण्हि-जाणु-कोप्पर-पहारसंभग्ग-महियगत्ता अट्टारसकम्मकारणा जाइयं-गमंगा कलुणा सुक्कोट्ठकंठगलकतालुजिब्भा जायंता पाणीयं विगयजीवियासा तण्हादिता वरागा तंपि य णं लभंति वज्झपुरिसेहिं घाडियंता तत्थ य खरफरुस-पडहधट्ठित-कूडग्गह-गाढरुट्ठ-निसट्ठपरामट्ठा वज्झकरकुडि-यजुयनियत्था सुरत्तकणवीर-गहिय-विमुकुल-कंदेगुणवज्झदूत-आविद्धमल्लदामा मरणभयुप्पण्णसेयमाय-तणेहुत्तुपियकिलिन्नगत्ता चुण्णगुंडिय-सरीरा रय-णेणुभरियकेसा कुसुंभगोक्खिण्णमुद्धया छिण्णजीवियासा धुण्णता वज्झपाणपीता तिलं-तिलं चेव छिज्ज-माणा सरीरविकित्त-लोहिओलित्त-कागणिमंसाणि खावियंता पावा खरकरसएहिं तालिज्जमाणदेहा वातिक-नरनारिसंपरिवुडा पेच्छिज्जंता य नागरजणेण वज्झनेवत्थिया पणेज्जंति नयरमज्झेण किवण-कलुणा अत्तामा असरणा अणाहा अबंधवा बंधुविप्पहीणा विपेक्खंता दिसोदिसिं मरणभयुत्विग्गा आघायण-पडिदुवार-संपाविया अधण्णा सूलग्ग-विलग्ग-भिण्णदेहा,

ते य तत्थ कीरंति परिकप्पियंगमंगा उल्लंबिज्जंति रुक्खसालेहिं केई कलुणाइं विलवमाणा अवरे चउरंग-धणियबद्धा पव्वयकडगा पमुच्चंते दूरपात-बहुविसम-पत्थरसहा अण्णे य गयचलण-मलण-निमद्विया कीरंति पावकारी अट्टारसखंडिया य कीरंति मुंडपरसूहिं केई उक्कत्तकण्णोदुनासा उप्पाडिय-नयणदसण-वसणा जिब्भंछिय-छिण्णकण्णसिरा पणिज्जंते छिज्जंते य असिणा निव्विसया छिण्णाहत्थ-पाया य पमुच्चंते जावज्जीवबंधणा य कीरंति केइ परदव्वहरणलुद्धा कारग्गलनियलजुयलरुद्धा चारगाए-हतसारा सयणविपपमुक्का मित्तजण-निरकक्या निरासा बहुजणधिककारसद्धलज्जावित अलज्जा अनुबद्धखुहा-परद्धा सीउण्हतण्हवेयणदुहट्ठद्विय-विवण्णमुह-विच्छवीया विहलमइलदुब्बला किलंता कासंता वाहिया य आमाभिभूयगत्ता परूढनहकेसमंसुरोमा छग-मुत्तम्मिणियगम्मि खुत्ता तत्थेव मया अकामका बंधिऊण पादेसु कड्डिया खाइयाए छूढा तत्थ य वग-सुणग-सियाल-कोल-मज्जारवंद-संदंसगतुंड-पक्खिगणविविहमुह-सयविलुत्तगत्ता कय-विहंगा केइ किमिणा य कुथितदेहा अणिद्वयणेहिं सप्पमाणा-सुट्ठकयं जं मउति पावो तुट्ठेणं जणेण हम्ममाणा लज्जावणका य होंति सयणस्सवि दीहकालं मया संता,

पुणो परलोगसमावण्ण नरगे गच्छंति निरभिरामे अंगारपलित्तककप्प-अच्चत्थ सीतवेदण-अस्सा ओदिण्ण-सततदुक्खसयसमभिदुते ततोवि उव्वट्ठिया समाणा पुणोवि पवज्जंति तिरियजोणिं तहिंपि निरयोवमं अनुभवंति वेयणं, ते अनंतकालेण जति नाम कहिंचि मणुयभावं लभंति नेगेहिं निरयगतिगमण-तिरियभव-सयसहस्स-परियट्ठएहिं तत्थवि य भवंतऽणारिया नीचकुलसमुप्पण्णा आरियजणेवि लोगवज्झा तिरिक्खभूता य अकुसला कामभोगतिसिया जहिं निबंधंति निरयवत्तिणि भवप्पवंचकरण-पणोल्लि पुणोवि संसार-नेमे धम्मसुति-विवज्जिया अमज्जा कूरा मिच्चत्तसुति-पवण्णा य होंति एगंतदंडरूड्ढो वेढेता कोसि-

कारकीडो व्व अप्पगं अट्टकम्मंतु-धणबंधणेणं एवं नरग-तिरिय-नर-अमर-गमणपेरंतचक्कवाल जम्मण-जरमरण-करण-गंभीरदुक्ख-पखुभियपउरसलिलं संजोगवियोगवीची-चिंतापसंगपसरिय-वहबंध-महल्लवि-पुल-कल्लोल-कलुणविलवित-लोभकलकलितंबोलबहुलं अवमाणणफेम-तिव्वखिसण-पुलपुलप्पभूयरोगवेयण-पराभ-वविणिवात-फरुसंधरिसणसमावडिय-कट्ठिणकम्मपत्थर-तरंगरंगंत-निच्च-मच्चुभय-तोयपट्ट कसायपायाल-संकुलं भवसयसहस्सजलसंचयं ।

सुयक्खंधो-१, अज्झयणं-३

अनंतं उव्वेयणयं अनोरपारं महब्भयं भयंकरं पड्भयं अपरिमियमहिच्छ-कलुसमतिवाउवेग-उद्धम्ममाण-आसापिवासपायाल-कामरति-रागदोसबंधण-बहुविसंकप्पविपुलदगरयरयंधकारं मोहमहावत्तभोगभ-ममाण-गुप्पमाणुव्वलंतबहुगब्भवास-पच्चोणियत्तपाणिय-पधावितवसणसमावण्ण-रुण्णचंडमारुयसमाहयऽमणु-ण्ण-वीचोवाकुलित-भंगफुट्ठंतऽनिट्टकल्लोलसंकुलजलं पमायबहुचंडदुट्ठसावयसमाहय-उट्ठायमाणगपूरघोर-विद्धंसणत्थबहुलं अन्नानभमंतमच्छपरिहत्थ-अनिहु-तिंदियमहामगरतुरियचरियखोखुब्भ-माण-संतावनिच्चय-चलतचवलचंचल-अत्ताणाऽसरणपुव्वकयकम्मसंचयो-दिण्णवज्जवेडज्जमाण-दुहसयविपाकधुण्णंतजलसमूहं इड्ढिरससायगारवोहारगहियकम्मपडिबद्धसत्त-कड्ढिज्जमाणनिरयतलहुत्तसण्णविसण्णबहुलं अरइरइभयविसाय-सोगमिच्छत्तसेलसंकडं अणातिसंताण-कम्म-बंधणकिलेसचिक्खल्लसुदुत्तारं अमरनरतिरियनिरयगतिगमणकु-डिलपरियत्तविपुलवेवं ।

हिंसा-लिय-अदत्तादान-मेहुण-परिग्गहारंभ-करणकारावणाणुमोदण-अट्ठाविहअणिट्टकम्मपिं-डित-गुरुभारोक्कंत-दुग्गजलोधदूरणि-वोलिज्जमाण-उम्मग्गनिमग्गदुल्लभतलं सारीरमणोमयाणि दुक्खाणि उप्पियंता सातस्सायपरितावणमयं उब्बुड्ढिनिबुड्ढयं करंता चउरंत-महंतमणवयग्गं रुद्धं संसारसागरं अट्ठिय-अणालंबणपतिठाणमप्पमेयं चुलसीति-जोणिसयसहस्सगुविलं अणालोकमंधकारं अनंतकालं निच्चं उत्तत्थ-सुण्ण-भय-सण्णसंपउत्ता वसंति उव्विग्गवासवसहिं जहिं-जहिं आउयं निबंधंति पावकारी बंधवजण-सयण-मित्तपरिवज्जिया अणिट्ठा भवंतऽणादेज्ज-दुव्विणीया कुट्ठामासण-कुसेज्ज-कुभोयणा असुइणो कुसंधयण-कुप्पमाण-कुसंठिया कुरूवा

बहुकोह माण-माया-लोभा बहुमोहा धम्मसण्ण-सम्मत्त-परिब्भट्ठा दारिद्वोवद्धवाभिभूया निच्चं परकम्म-कारिणो जीवणत्थरहिया किविणा परपिंडतक्कका दुक्खलद्धाहारा अरस-विरस-तुच्छ-कयकुच्छिपूरा परस्स पेच्छंता रिद्धिसक्कार-भोयमविसेस-समुदयविहिं निंदंता अप्पकं कयंतं च परिवयंता इह य पुरेकडाइं कम्माइं पावगाइं विमणा सोएण डज्झमाणा परिभूया होंति सत्तपरिवज्जिया य छोभा सिप्प-कला-समय-सत्थ-परिवज्जिया जहायजायपसुभूया अचियत्ता निच्चनीयकम्मोवजीविणो लोयकुच्छणिज्जा मोहमणोरह-निरासबहुला आसापासपडिबद्धपाणा अत्थोपायाण-कामसोक्खे य लोयसारे होंति अपच्चंतगा य सुट्ठुवि य उज्जमंता तट्ठविसुज्जुत्त-कम्मकयदुक्ख-संठविय-सित्थपिंड-संचयपरा खीणदववसारा निच्चं अधुवधण-धण्ण-कोस-परिभोग-विवज्जिया रहिय-कामभोग-परिभोग-सव्व-सोक्खा परसिरिभा-गोवभोगनिस्साण-मग्गणपराय-णावरागा अकामिकाए विणेंति ।

दुक्खं नेव सुहं नेव निव्वुतिं उवलभंति अच्चंतविपुलदुक्खसय-संपलित्ता परस्स दव्वेहि जे अवरिया एसो सो अदिन्नादाणस्स फलविवागो इहलोइओ पारलोइओ अप्पसुहो बहुदुक्खो महब्भओ बहुरयप्पगाढो दारुणो कक्कसो असाओ वाससहस्सेहिं मुच्चति न य अवेयइत्ता अत्थि हु मोक्खोत्ति-

एवमाहंसु नायकुलनंदणो महप्पा जिणो उ वीरवरनामधेज्जो कहेसी य अदिन्नादाणस्स फलविवागं लोभमूलं एवण जाव चिरपरिग-तमणुगतं दुरंतं ततियं अहम्मदारं समत्तं त्ति बेमि ।

◦ पढमे सुयक्खंधे तइअं अज्झयणं/तइअं आसव दारं समत्तं ◦

◦ मुनि दीपरत्नसागरेण संशोधितः सम्पादितश्च तइअं अज्झयणं समत्तं ◦

सुयक्खंधो-१, अज्झयणं-४

[] चउत्थं अज्झयणं/चउत्थं आसवदारं []

[१७] जंबू! अबंभं च चउत्थं-सदेवमणुयासुरस्स लोयस्स पत्थणिज्जं पंक-पणग-पासजाल-भूयं थी-पुरिस-नपुंसगवेदचिंधं तव-संजम-बंधेच-विग्घं भेदाययण-बहुपमादमूलं कायरकापुरिससेवियं सुयणजणवज्जणिज्जं उइढं नरग-तिरियतिलोक्कपइद्वाणं जरा-मरण-रोग-सोगबहुलं वध-बंध-विधाय-दुव्विघायं दंसण-चरित्तमोहस्स हेउभूयं चिरपरिचियमणुगयं दुरंतं चउत्थं दारं ।

[१७] तस्स य नामाणि गोण्णाणि इमाणि होंति तीसं तं जहा- अबंभं, मेहुणं, चरंतं, संसग्गि, सेवणाधिकारो, संकप्पो, बाहणा पदाणं, दप्पो, मोहो, मणसंखोभो, अणिग्गहो, वुग्गहो, विघाओ, विभंगो, विब्भमो, अधम्मो, असीलया, गामधम्मतित्ती, रती, रागो, कामभोगमारो, वेरं, रहस्सं, गुज्झं, बहुमाणो, बंधेच-विग्घो, वावत्ति, विराहणा, पसंगो, कामगुणो त्ति, अवि य तस्स एयाणि एवमादीणि नामधेज्जाणि होंति तीसं ।

[१९] तं च पुण निसेवन्ति सुरगण सअच्छरा मोह-मोहिय-मती-असुर-भुयग-गरुल-विज्जु-जलण-दीव-उदहि-दिस-पवण-थणिया अणवणिय-पणवणिय-इसि-वादिय-भूयवादियकंदिय-महाकंदिय-कूहंड-पतगदेवा पिसाय-भूय-जक्ख-रक्खस्स-किन्नर-किंपुरिस-महोरग-गंधव्व-तिरिय-जोइस-विमाणवासि-मणुयगणा जलयर-थलयर-खहयरा य मोहपडिबद्धचित्ता अवितण्हा कामभोगतिसिया तण्हाए बलवईए महईए समभिभूया गट्ठिया य अतिमुच्छिया य अबंभे ओसण्णा तामसेण भावेण अनुम्मक्का दंसण-चरित्तमोहस्स पंजरं पिव करैति अण्णोण्णं सेवमाण भुज्जो असुर-सुर-तिरिय-मणुय-भोगरति-विहार-संपउत्ता य चक्क-वट्ठी सुरनरवतिसक्कया सुरवरव्व देवलोए भरह-नग-नगर-नियम-जणवय-पुरवर-दोणमुह-खेड-कब्बड-मंडब-संबाह-पट्टण-सहस्स-मंडियं थिमिय-मेयणियं एगच्छत्तं ससागरं भुंजिऊण वसुहं,

नरसीहा नरवई नरिंदा नरवसभा मरुय-वसभक्कप्पा अब्भहियं रायतेय-लच्छीए दिप्पमाणा समा रायवंस-तिलगा रवि-ससि-संख-वरचक्क-सोत्थिय-पडाग-जव-मच्छ-कुम्म-रहवर-भग-भवन-विमाण-तुरय-तोरण-गोपुर-मणि-रयण-नंदियावत्त-मुसल-नंगल-सुरइयवरकप्प-रुक्ख-मिगवति-भद्दासण-सुरुचि-थूभ-वरमउड-सरिय-कुंडल-कुंजर-वरवसभ-दीव-मंदिर-गरुल-द्वय-इंदकेउ-दप्पण-अट्ठावय-चाव-बाण-नक्खत्त-मेह-मेहल-वीणा-जुग-छत्त-दाम-दामिणि-कमंडलु-कमल-घंटा-वरपोत-सुइ-सागर-कुमुदगार-मगर-हार-गागर-नेइउर-नग-नगर-वइर-किन्नर-मयूर-वररायहंस-सारस-चकोर-चक्कवागमिहुण-चामर-खेडग-पव्वीसग-विपंचि-वतालियंट-सिरिया-भिसेय-मेइणि-खग्ग-अंकुस-विलमकलस-भिंणार-वद्धमाणग-पसत्थ-उत्तमविभ-त्तवर-पुरिसलक्खणधरा बत्तीसं रायवर-सहस्साणुजायमग्गा चउसट्ठिसहस्सपवरजुवतीण नयणकंता रत्ताभा पउम-पम्ह-कोरंटगदाम-चंपक-सुतवित-वरकण-कनिहसवण्णा सुजाय-सव्वंगसुंदरंगा महग्घ-वरपट्टणुग्गय-विचित्त-

राग-एणि-पेणि-निम्मिय-दुगुल्ल-वरचीणपट्ट-कोसेज्ज-सोमीसुत्तक-विभूसियंगा वरसुरभिगंध-वरचुण्णवास-
वरकुसुमभरिय-सिरया कप्पिय-छेयायरियसुकय-रइतंमाल-कडगंगय-तुडिय-पवरभूसण-पिणद्धदेहा एकावलिक-
ठसुरइयचवच्छा पालंबलंव-माणसुकयपडुत्तरिज्जमुद्धियापिंगलंगुलिया,

उज्जल-नेवत्थ-रइय-चिल्लग-विराय-माणा तेएण दिवाकरोव्व दित्ता सारय-नवथणिय-महुर-
गंभीर-निद्धघोसा उप्पण्णसमत्तरयण-चक्करयणप्पहाणा नवनिहिवइणो समिद्धकोसा चाउरंता चाउराहिं
सेणाहिं समणुजाइज्जमाणमग्गा तुरगवती गयवती रहवती नरवती विपुलकुलविस्सुयजसा सारयससिसकल-
सुयक्खंधो-१, अज्झयणं-४

सोमवयणा सूरा तेलोक्क-निग्गय-पभावलद्धसद्धा समत्तभरहाहिवा नरिंदा ससेलवण-काणणं च हिमवंत-
सागरंतं धीरा भुत्तूणं भरहवासं जियसत्तू पवररायसीहा पुव्वकडतवप्पभावा निविद्ध-संचियसुहा अणेगवास-
सयमायुवंतो भज्जाहि य जणवयप्पहामाहिं लालियंता अतुल-सद्ध-फरिस-रस-रूवं-गंधे य अनुभवित्ता तेवि
उवणमंति मरणधम्मं अवितित्ता कामाणं,

भुज्जो भुज्जो बलदेव-वासुदेवा य पवरपुरिसा महाबलपरकम्मा महाधणुवियइडका महासत्त-
सागरा दुद्धा धणुद्धरा नरवसभा रामकेसवा भायरो सपरिसा वसुदेव-समुद्धविजयमादियदसाराणं पज्जुण्ण-
पयिव-संब-अनिरुद्ध-निसह-उम्मुय-सारण-गय-सुमुह-दुम्मुहा-दीण जायवाणं अद्धइणावि कुमारकोडीणं
हिययदयिया देवीए रोहिणीए देवीए देवकीए य आणंदहियय-भावनंदणकरा सोलस रायवरसहस्साणु-
जातमग्गा सोलसदेवीसहस्स-वरणयण-हिययदयिया नाणामणि-कणग-रयण-मोत्तिय-पवाल-धण-धन्नसंचय-
रिद्धि-समिद्ध-कोसा हय-गय-रह-सहस्ससामी गामागर-नगर-खेड-कब्बड-मडंब-दोणमुह-पट्टणासम-संबाह-
सहस्सथिमियनिव्वुयपमुदितजण-विविहसस्सनिप्फज्जमाणमेइणि-सर-सियतलागसेल-काणण-आरामुज्जाण-
मणाभिरामपरिमंडियस्स दाणिइडवेयइडगिरिविभत्तस्स लवणजलहि-परिगयस्स छव्विहकालगुणकमजुत्तस्स
अद्धभरहस्स सामिका धीरकित्तिपुरिसा ओहबला अइबला अनिहया अपराजियसत्तुमद्दणा रिपुसहस्स-पमाण-
महणा साणुक्कोसा अमच्छरी अचवला अंचडा मितमं-जुलपलावा हसिय-गंभीर-महुरभणिया अब्भुवगय-
वच्छला सरण्णा लक्खण-वंजम-गुणोववेया माणुम्माण-पमाण-पडिपुन्ना-सुजाय-सव्वंगसुंदरंगा ससि-सोमा-
गार-कंतपियदंसणा अमरिसणा पयंडडंप्पयार-गंभीर-दरिसणिज्जा तालद्धय-उव्विद्धगरुलकेऊ,

बलवग-गज्जंत-दरित-दप्पित-मुट्ठियचाणूरमूरगा रिद्धवसभघाती-केसरिमुह-विप्फाडगा
दरितनागदप्पमहणा जमलज्जुणभंजगा महा-सउणि-पूतणरिऊ कंसमउडमोडगा जरासंध-माणमहणा तेहि य
अविरल-सम-सहिय-चंदमंडल-समप्पभेहिं सूरमिरीयकवयं विणिम्मुयंतेहिं सपतिदंडेहिं आयवत्तेहिं
धरिज्जंतेहिं विरायंता ताहि य पवरगिरिगुहरविहरणसमुद्धियाहिं निरुवहयचमर-पच्छिमसरीर-संजाताहिं
अमइल-सियकमल-विणिमुकुलुज्जलित-रयतगिरिसिहर-विमलससि-किरणसरिस-कलहोय-निम्मलाहिं
पवणाहयचवल-चलिय-सललिय-पणच्चिय-वीइपसरिय-खीरोदगपवरसागरूपूरचंचालहिं माणस-सरपसरपपिचि-
यावास-विसद-वेसाहिं कणगगिरिसहर-संसितहिं ओवायुप्पाय चवलजयिणसिग्धवेगाहिं हंसव-धूयाहिं चेव
कलिया नाणाम-णिकणग-महरिहतवणिज्जुज्जलविचित्त-डंडाहि सललियाहिं नरवतिसि-
रिसमुदयप्पकासणकरीहिं वरपट्ट-गुग्गयाहिं समिद्धरायकुल-सेवियाहिं कालागुरुपवर-कुंदुरुक्क-तुरुक्क-धूववस-
वास विसद-गंधुदधुयाभिरामाहिं चिल्लिकाहिं उभयोपासंपि चामराहिं उक्किप्प-माणाहिं
सुहसीतलवातवीतियंगा,

अजिता अजितरहा हल-मुसल-कणगपाणी संखचक्क-गय-सत्ति-नंदगधरापवरुज्जलसुकाय-
विमलकोत्थुभ-तिरीडधारीकुंडलउज्जोवियाणणापुंडरीय-नणया एगावलीकंठरइयवच्छा सिरिवच्छसुलंछणा
वरजसा सव्वोउय-सुरभि-कुसुम-सुरइय-पलंब-सोहंत-वियसंत-चित्तवणमालरइयवच्छा अट्टसयविभत्त-लक्खण-
पसत्थसुंदर विराइयंगमंगा मत्तगयवरिंद-ललियविक्कम-विलसियगती कडिसुत्तगनील-पीत-कोसेज्ज-वाससा
पवरदित्ततेया सारयनव-थणिय-महुरगंभीर-निद्धघोसा नरसीहा सीहविक्कमगई अत्थमिय-पवरराय-सीहा
सोमा वारवइ-पुन्नचंदा पुव्वकडतवप्पभावा निविट्टसंचियसुहा अणेगवाससयमायुवंतो भज्जाहि य जणवयप्प-
हाणाहि लालियंता अतुलसद्ध-फरिस-रस-रूव-गंधे अनुभवेत्ता ते वि उवणमंति मरण-धम्मं अवितित्ता
कामाणं,

सुयक्खंधो-१, अज्झयणं-४

भुज्जो मंडलिय-नरवरेंदा सबला सअंतेउरा सपरिसा सपुरोहिय-अमच्च-दंडना-यक-सेणावति-
मंतनीतिकुसला नाणामणियरण-विपुलधण-धन्न-संचयनिही समिद्धकोसा रज्जसिरिं विपुलमणुभविता
विक्ककोसंता बलेणं मत्ता ते वि उवणमंति मरणधम्मं अवितित्ता कामाणं,

भुज्जो उत्तरकुरु-देवकुरु-वणविवर-पायचारिणो नरगणा भोगुत्तमा भोगलक्खणधरा भोगस-
स्सिरीया पसत्थसोम्मपडिपुन्नरूवदरिसणिज्जा सुजात-सव्वंग-सुंदरंगा रत्तुप्पलपत्तकंत-कर-चरण-
कोमलतला सुपइट्टिय-कुम्माचारुचलणा अनुपुव्वसुसंहयंगुलीया उन्नततणुतंब-निद्धनक्खा संठिय-
सुसिलिड्ढगूढगौफा एणी-कुरुविंद-वत्त-वट्ठाणुपुव्वजंघा समुग्ग-निसग्गगूढजाणू वरवारण-मत्त-तुल्लविक्कम-
विलासितगती वरतुरग-सुजायगुज्झदेसा आइण्णहयव्व निरुवलेवा पमुइवरतुरगसीह-अतिरेगवट्टियकडी
गंगावत्त दाहिणावत्त तरंगभंगुर रविकिरण बोहिय विकोसायंत पम्हगंभीर विवडनाभी साहतसोणंद-मुसल-
दप्पण-निगरियवर-कणगच्छरुसरिस-वरवरवलिय-मज्झा उज्जुग-सम-सहिय-जच्चतणु-कसिण-निद्ध-अदेज्ज-
लडह-सूमाल-मउयरोमाई झस-विहग-सुजातपीण-कुच्छी झसोदरा पम्हविगडनाभा सन्नतपासा संगयपासा
सुंदपासा सुजातपासा मितमाइव-पीणरइयपासा अकरंडुय-कणगरुय-गनिम्मल-सुजाय-निरुवहयपदेहधारी
कणगसिला-तल-पसत्थ-समतल-उवइय-विच्छिण्णापिहुलवच्छा जुयस-न्निभपीणरइय-
पीवरपउट्टसंठियसुसिलिड्ढ-विसिड्ढलड्ढसुनिचितघणथिरसुबद्धसंधी पुरवरफलिह-वट्टिय-भुया भुयईसरविपुलभोग-
आयणफलिह-उच्छूढ-दीहबाहू रत्ततलोवइय-मउय-मंसल-सुजायलक्खण-पसत्थ-अच्छिद्वजालपाणी
पीवरसुजायकोमलवरगुली तंबत-लिणसुइरुइलनिद्धनक्खा,

निद्धपाणिलेहा चंदपाणि लेहा सूरपाणिलेहा संखपाणिलेहा चक्कपाणिलेहा दिसासोवत्थिय-
पाणिलेहा रवि-ससि-संख-वरचक्क-दिसासोव-त्थिय-विभत्त-सुविरइय-पाणिलेहा-वरमहिस-वराह-सीह-सदुल-
रिसह-नागवर-पडिपुन्न-विउलखंधा चउरंगुल-सुप्पमाण-कंबुवरसरिसगीवा अवट्टिय-सुविभत्त-चित्तमंसू
उवचिय-मंसल-पसत्थ-सदुलविपुलहणुया ओयविय-सिल-प्पवाल-बिंबफलसन्निभाधरोट्टा पुंडरससिसकल-
विमल-संख-गोखीर-फेण-कुंद-दगरय-मुणालिय-धवल-दंतसेढी अखंडदंता अप्फुडियदंता अविरल-दंता
सुणिद्धदंता सुजायदंता एगदंतसेढिव्व अमेगदंता हुयवह-निद्धंतधोयतत्ततवणिज्जरत्ततल-तालुजीहा
गरुलायत-उज्जुतुंगनासा अवदालियपोंडरीयनयणा कोकासियधवल-पत्तलच्छा आणामिय-चारुइल-
किण्हब्भराजिय-संठिय-संगयायय-सुजायभुमगा अल्लीणपमाणजुत्तसवणा सुसवणा पीणमंसलकवोलदेसभागा
अचिरुग्गय-बालचंदसंठियमहानिडाला उडुवतिरिव पडिपुन्नसोमवयणा छत्तागारुत्तमंगदेसा
धणनिचियसुबद्धलक्खणुण्ण-यकूडागारनिभपिडियग्गसिरा हुयवहनिद्धंतधो-यतत्त-तवणिज्ज-

रत्तकेसंतकेसभूमी सामलीपौडधणनिवछोडिय-मिउ-विसद-पसत्थ-सुहुम-लक्खण-सुगंध-सुंदर-भुयमोयग-भिग-नील-कज्जल-पहदुभमरण-निद्ध निगुरुंब-निचिय-कुंचिय-पयाहिणावत्त-मुद्धसिरया सुजात-सुविभत्त-संगयंगा लक्खणवंजणगुणोववेया पसत्थबत्तीस-लक्खणधरा हंसस्सरा कुंचस्सरा दुंदुभिस्सरा सीहस्सरा ओघस्सरा मेघस्सरा सुस्सरा सुस्सरनिग्घोसा,

वज्जरिसहनाराय-संघयणा समचरउससंठाणसंठिया छायाउज्जोवियंगमंगा छवी निरातंका कंकग्गहणी कवोतपरिणामा सउणिपोस-पिड्ढंतरोरुपरिणया पउमुप्पलसरिसगंधसास-सुरभिवयणा अनुलोम-वाउलवेगा अवदाय-निद्ध-काला विग्गहिय-उण्णय-कुच्छी अमयरसफलाहारा तिगाउय-समूसिया तिपलिओव-मद्धितीका तिण्णि य पलिओवमाइं पउमाउं पालयित्ता ते वि उवणमंति मरणधम्मं अवितित्ता कामाणं,

पमया वि य तेसिं होंति-सोम्मा सुजाय-सव्वंग-सुंदरीओ पहाम-महिलगुणेहिं जुत्ता अति-सुयक्खंधो-१, अज्झयणं-४

कंत-विसप्पमाण-मउय-सुकुमाल-कुम्मसंठिय-सिलिद्धचरणा उज्जु-मउय-पीवरसुसंहंतगुलीओ अब्भुण्णत-रतिद-तलिण-तंब-सुइ-निद्धनक्खा रोमरहिय-वट्ठसंठिअ-अज्ज-हण्ण-पसत्थ-लक्खण-अकोप्प-जंघजुयला-सुणिम्मित-सुनिगूढ-जण्णमंसल-पसत्थ-सुबद्ध-संधी कय-लीखंभातिरेकसंठिय-निव्वणसुकुमाल-मउय-कोमल-अविरल-सम-सहित-वट्ठ-पीवर-निरंतरोरु अट्ठावयवीचिपट्ठसंठिय-पसत्थविच्छिण्णपिहुलसोणी वयणावा-मप्पमाणदुगुणिय-विसा-लमंसलसु-बद्धजहणवरधारिणीओ वज्जविराइय-पसत्थलक्खणनिरोदरीओ तिवलिव-लित-तणु-नमियमज्झियाओ उज्जुय-सम-सहिय-जच्च-तणु-कसिण-निद्ध-आदेज्ज-लडग-सुकुमाल-उय सुवि-भत्तरोमराई गंगावत्तग-पदाहिणावत्त-तरंगभंग-रविकिरण-तरुम-बोधितकोसायंतपउम-गंभीर-विगडनाभी,

अनु-ब्भडपसत्थजातपीणकुच्छी सन्नतपासा संगतपासा सुंदरपासा सुजातपासा मियमायिय-पीणरइतपासा अक-रंडुय-कणगरुयगनिम्मल-सुजाय-निरुवहयगायलट्ठी कंचणकलसपमाण-सम-सहिय-लट्ठचूचुयआमेलग-जमल-जुयल-वट्ठियपओहराओ भुयंगअणुपुव्वतणुय-गो-पुच्छवट्ठ-सम-सहिय-नमिय-आदेज्ज-लडहबाहा तंबनहा मंसलग्गहत्था कोमल पीवरवरंगुलीया निद्धपाणिलेहा ससि-सूर-संख-चक्क-वरसोत्थिय-विभत्त-सुविरइय-पाणिलेहा पीनुण्णयकक्खवत्थिप्पदेसे-पडिपुन्नगलकवोला चउरंगुलसुप्पाण-कंबुवरसरिसगीवा मंसलसंठियपसत्थहणुया दालियपुप्फ-गास-पीवर-पलंबकुंचितवराधरा सुंदरोत्तरोट्ठा दधि-दगरय-कुंद-चंद-वासंतिमउल-अच्छिद्धविम-लदसणारत्तुप्पल-रत्तपउमपत्त-सुकुमाल-तालु-जीहा-कणवीर-मउल अकुडिलऽब्भुण्णय-उज्जुतुंगनासा,

सारदनवकमल-कुमुत-कुवलयदलनिगरसरिसलक्खण-पसत्थ-अजिम्हकंतनयणा आनामियचा-वरुइल-किण्हभराइसंगय-सुजाय-तणु-कसिण-निद्धभुमगा अल्लीणपमाणजुत्तवणा सुस्सवणा पीणमट्ठ-गंडलेहा चउरंगुलविसाल-समनिडाला कोमुदिरयणिकरविमलपडिपुन्नसोमवदणा छत्तुन्नय-उत्तिमंगा अकविल-सुसिणिद्ध-दीहसिरया छत्त-ज्झय-जूव-थूभ-दामिणि-कमंडलु-कलस-वावि-सोत्तिय-पडाग-जव-मच्छ-कुम्म-रहवर-मकरज्झय-अंक-थाल-अंकुस-अट्ठावय-सुपइट्ठ-अमर-सिरियाभिसेय-तोरण-भेइणि-उदधिवर-पवर-भवण-गिरिवर-वरायंस सुललियगय-उसभ-सीहचामर पसत्थबत्तीसलक्खणधरीओ हंससरिच्छगतीओ कोइल-महुरि-गिराओ कंता सव्वस्स अनुमयाओ ववगयवलिपलितवंग-दुव्वन्न-वाधि-दोहग्ग-सोयमुक्काओ उच्चत्तेण य नराण थोवूण-मूसियाओ सिंगारगारचारूवेसा सुंदर-थण-जहण-वयमण-कर-चरण नयणा लावण्णरूव-जोव्वम-गुणोववेया नंदणवनविवरचारिणीओ व्व अच्छराओ उत्तरकुरुमाणुसच्छराओ अच्छेरग-पेच्छ-णिज्जियाओ तिण्णि य पलिओवमाइं परमाउं पालयित्ता ताऽवि उवनमंति मरणधम्मं अवितित्ता कामाणं ।

[२०] मेहुणसण्णासंपगिद्धा य मोहभरिया सत्थेहिं हणंति एक्कमेक्कं विसयविसउदीरएसु अवरे परदारेहिं हम्मंति विसुणिया धणनासं सयणविप्पणासं च पाउणंति परस्स दारओ जे अविरया मेहुण-सण्णासंपगिद्धा य मोहभरिया अस्सा हत्थी गवा य महिसा मिगा य मारेंति एक्कमेक्कं मणुयगणा वानरा य पक्खी य विरुज्झंति मित्ताणि खिप्पं भवंति सत्तू समये धम्मं गणे य भिंदंति पारदारी धम्मगुणरया य बंभयारी खणेण उल्लोदुए चरित्तओ जसमंतो सुव्वया य पावंति अयसकित्तिं रोगत्ता वाहिया य वड्ढेंति रोयवाही, दुवे य लोया दुआरागा भवंति-इहलोए चेव परलोए-परस्स दाराओ जे अविरया तहेव केइ परस्स दारं गवेसमाणा गहिया हया य बद्धरुद्धा य अवं जाव नरगे गच्छंति निरभिरामे विपुलमोहाभिभूयसण्णा, मेहुणमूलं च सुव्वए तत्थ-तत्थ वत्तपुव्वा संगामा बहुजणक्खयकरा सीयाए दोवतीए कए रुप्पिणीए पउ-मावईए ताराए कंचणाए रत्तसुभद्धाए अहिल्लियाए सुवण्णगुलियाए किन्नरीए सुरूवविज्जु-मतीए रोहणीए य,
सुयक्खंधो-१, अज्झयणं-४

अण्णेसु य एवमादिएसु बहवो महिलाकएसु सुव्वंति अइक्कंता संगामा गामधम्मूला इहलोए ताव नद्धा परलोए वि य नद्धा महयामोहतिमिसंधकारे घोरे तसथावर-सुहुमबादरेसु पज्जत्तमपज्जत्तक-साहारणसरीर-पत्तेयसरीरेसु य अंडज-पोतज-जराउय-रसज-संसेईम-संमुच्छिम-उब्भिय-उववाइएसु य नरग-तिरिय-देव-माणुसेसु जरा-मरण-रोग-सोग-बहुले पलिओवम-सागरोवमाइं अणादीयं अणवदग्गं दीहमद्धं चाउरंतं संसारकंतारं अनुपरियट्ठंति जीवा मोहवससण्णिविद्धा एसो सो अंबस्स फलविवागो इहलोइओ पारलोइओ य अप्पसुहो बहुदुक्खो महब्भओ बहुरवप्पगाढो दारुणो कक्कसो असाओ वाससहस्सेहिं मुच्चती, न य अवेदयित्ता अत्थि हु मोक्खोत्ति-एवमाहंसु नायकुलनंदणो महप्पा जिणो उ वीरवरनामधेज्जो कहेसी य अंबंभस्स फलविवागं एयं तं अंबंभंति चउत्थं सदेवमणुया-सुरस्स लोगस्स पत्थणिज्जं एवं चिरपरिचिय-मणुगयं दुरंतं चउत्थं अधम्मदारं समत्तं त्ति बेमि ।

◦ पढमे सुयक्खंधे चउत्थं अज्झयणं/चउत्थं आसव दारं समत्तं ◦

◦ मुनि दीपरत्नसागरेण संशोधितः सम्पादित्तश्च चउत्थं अज्झयणं समत्तं ◦

[] पंचमं अज्झयणं/पंचमं आसवदारं []

[२१] जंबू! एत्तो परिग्गहो पंचमो उ नियमा-नाणामणि-कणग-रयण-महरिह-परिमल-सपुत्तदार-परिजण-दासी-दास-भयग-पेस-हय-गय-गो-महिस-उट्ट-खर-अय-गवेलग-सीया-सगड-रह-जाण-जुग्ग-संदण-सयणसण-वाहण-कुविय-धण-धण्ण-पाण-भोयण-अच्छायण-गंध-मल्ल-भायण-भवणविहिं चेव बहुविहीयं भरहं नग-नगर-नियम-जणवय-पुरवर-दोणमुह-खेड-कब्बड-मडंब-संबाह-पट्टण-सहस्समंडियं थिमियमेइणीयं एगच्छत्तं ससागरं भुंजिऊण वसुहं अपरिमिय-मणंततण्हमणुगय-महिच्छसार-निरयमूलो लोभकलिकसाय-महक्खंधो चिंतासयनिचियविपुल-सालो गारव-पविरल्लियग्गविडवो नियडि-तयापत्तपल्ल-वधरो पुप्फफलं जस्स कामभोगा आयासविसूराकलह-पंकपियग्गसिहरो नरवतिसंपूजितो बहुजणस्स हियदइओ इमस्स मोक्खवर-मोत्तिमग्गस्स पलिहभूओ चरिमं अहम्मदारं ।

[२२] तस्स य नामाणि गोण्णाणि होंति तीसं तं जहा- परिग्गहो, संचयो, चयो, उवचयो, निहाणं, संभारो, संकरो, आयरो, पिंडो, दव्वसारो, तहा महिच्छा, पडिबंधो, लोहप्पा, महद्दी, उवकरणं,

संरक्खणा य, भारो, संपायुप्पायको, कलिकरंडो, पवित्रो, अमत्थो, संधवो, अगुत्ती, आयासो, अविओगो, अमुत्ती, तण्हा, अणत्थको, आसत्ती, असंतोसो त्ति अवि य, तस्स एयाणि एवमादीणि नामधेज्जाणि ।

[२३] तं च पुण परिग्गहं ममायंति लोभधत्था भवनवरविमाणवासिणो परिग्गहरुयी परिग्गहे विविहकरणबुद्धी देवनिकाया य-असुर-भुयग-गरुल-विज्जु-जलण-दीव-उदहि-दिसि-पवण-थणिय-अणवणिय-पणवणिय-इसिवाइय-भूतवाइय-कंदिय-महाकंदिय-कुहंड-पतंगदेवा पिसाय-भूय-जक्ख-रक्खस-किन्नर-किंपु-रिस-महोरग-गंधच्चा य तिरियवासी पंचविहा जोइसिया य देवा-बहस्सती-चंद-सूर-सुक्क-सनिच्छरा राहु-धूमकेउ बुधा य अंगारका य तत्ततवणिज्जकणग-वण्णा जे य गहा जोइसम्मि चारं चरंति केऊ य गतिर-तीया अट्ठावीसतिविहा य नक्खत्तदेवगणा नाणासंठाणसंठियाओ य तारगाओ ठियलेस्सा चारिणो य अवि-स्साम-मंडलगती उवरिचरा उड्डलोगवासी दुविहा वेमाणिया य देवा-सोहम्मिमाण-सणकुमार-माहिंद-बंधलो-ग-लंतक-महासुक्क-सहस्सार-आणय-पाणय-आरणच्चुय-कप्पवरविमाण-वासिणो सुरगणा गेवेज्जा अनुत्तरा य दुविहा कप्पातीया विमाणवासी महिड्डिका उत्तमा सुरवरा एवं च ते चउव्विहा सपरिसा वि देवा ममा-सुयक्खंधो-१, अज्झयणं-५

यंति भवण-वाहण-जाण-विमाण-सयणासणाणि य ।

नाणाविहवत्थभूसाणाणि य पवरपहरणाणि य नाणामणिपंच-वण्णदिव्वं च भायणविहिं नाणा-विह-कामरूव-वेउव्विय-अच्छरगणसंघाते दीवसमुद्दे दिसाओ चेतियाणि वणसंडे पव्वते गामनगराणि य आरामुज्जाण-काननाणि य कूव-सर-तलाग-वावि-दीहिय-देवकुल-सभ-प्पव-वसहिमाइयाइं बहुकाइं कित्तणाणि य परिगेण्हित्ता परिग्गहं विपुलदव्वसारं देवावि सइंदगा न तित्ति न तुट्ठिं उवलभंति उच्चंत-विपुल-लोभाभिभूतसन्ना वासहर-इसुगार-वट्टपव्वय-कुंडल-रूयगवर-माणुसुत्तर-कालोदधि-लवण-सलिलदगपति-रतिकर-अंजणकसेल-दहिमुहओवातुप्पाय-कंचणक-चित्त-विचित्त-जमक-वरसिहरि-कूडवासी कक्खार-अकम्मय-भूमीसु सुविभत्तभागदेसासु कम्मभूमिसु जेऽवि य नरा चाउरंत-चक्कवट्ठी वासुदेवा बलदेवा इस्सरा तलवरा सेणावती इब्भा सेट्ठी रट्ठिया पुरोहिया कुमारा दंडणायगा माडंबिया सत्थवाहा कोडुंबिया अमच्चा एए अण्णे य एवमादी परिग्गहं संचिणंति अनंतं असरणं दुरंतं अधुवमणिच्चं-असासयं पावकम्मनेम्मं अवकि-रियव्वं विणासमूलं वहबंधपरिकिलेसबहुसं अनंतसंकिलेकरणं,

ते णं धण-कणग-रयण-निचयं पिंडिता चेव लोभ धत्था संसारं अतिवयंति सव्वदुक्ख-संनि-लयणं परिग्गहस्सेव य अट्ठाए सिप्पसयं सिक्खए बहुजणो कलाओ य बावत्तरिं सुनिपुणाओ लेहाइयाओ सउणरूयावसाणाओ गणियप्पहाणाओ चउसट्ठिं च महिलागुणे रतिजण्णे सिप्पसेवं असि-मसि-किसी-वाणिज्जं ववहारं अत्थसत्थ-ईसत्थ-च्छरूपगयं विविहाओ य जोगजुंजणाओ य अण्णेसु एवमादिएसु बहूसु कारणसएसु जावज्जीवं नडिज्जए संचिणंति मंदबुद्धी परिग्गहस्सेव य अट्ठाए करंति पाणाण वहकरणं अलियनियडि-साइ-संपओगे परदव्व-अभज्जा सपरदारगमणसेवणाए आयास-विसूरणं कलह-भंडण-वेराणि य अवमाण-विमाणणाओ इच्छ-महिच्छ-प्पिवास-सततति-सिया तण्ह-गेहि-लोभ-धत्था अत्ताण-अणिग्गहिया करंति कोहमाणमायालोभे अकित्तणिज्जे परिग्गहे चेव होंति नियमा सल्ला दंडा य गारवा य कसाय-सण्णा य कामगुण-अण्हगा य इंदियलेसाओ सयम-संपओगा सचित्ताचित्तमीसगाइं दव्वाइं अनंतकाइं इच्छंति परिधेत्तुं सदेवमणुयासुरम्मि लोए लोभपरिग्गहो जिणवरोहिं भणिओ नत्थि एरिसो पासो पडिबंधो सव्वजीवाणं सव्वलोए ।

[२४] परलोगम्मि य नट्ठा तमं पविट्ठा महया मोहमोहियमती तिमिसंधकारे तसथावर-
सुहुमबादरेसु पज्जत्तमपज्जत्तग-एवं जाव परियट्ठंति जीवा मोहवसण्णिविट्ठा एसो सो परिग्गहस्स
फलविवाओ इहलोइओ परलोइओ अप्पसुहो बहुदुक्खो महब्भओ बहुरयप्पगाढो दारुणो कक्कसो असाओ
वाससहस्सेहिं मुच्चई, न य वेदयित्ता अत्थि हु मोक्खोत्ति-एवमाहंसु नायकुलनंदणो महप्पा जिणो उ
वीरवरनामधेज्जो कहेसी य परिग्गहस्स फलविवागं । एसो सो परिग्गहो पंचमो उ नियमा-नाणामणि-
कणग-रयण-महरिह एवं जाव इमस्स मोक्खवर-मोत्तिमग्गस्स फलिहभूयो चरिमं अधम्मदारं समत्तं ।

[२५] एएहिं पंचहिं असंवरेहिं रयमादिणित्तु अनुसमयं ।

चउव्विहगतिपरंतं अनुपरियट्ठंति संसारं ॥

[२६] सव्वगई-पक्खंदे काहेति अनंतए अकयपुण्णा ।

जे य णं सुणंति धम्मं सोऊण य जे पमायंति ॥

[२७] अनुसिद्धं पि बहुविहं मिच्छदिट्ठी नरा अबुद्धीया ।

बद्धलनिकाइयकममा सुणंति धम्मं न य करंति ॥

सुयक्खंधो-१, अज्झयणं-५

[२८] किं सक्का कां जे जं नेच्छह ओसहं मुहा पाउं ।

जिणवयणं गुणमहुरं विरेयणं सव्वदुक्खाणं ॥

[२९] पंचेव उज्झिऊण पंचेव य रक्खिऊण भावेण ।

कम्मरय-विप्पमुक्का सिद्धिवरमणुत्तरं जंति ॥

◦ पढमे सुयक्खंधे पंचमं अज्झयणं/पंचमं आसव दारं समत्तं ◦

() पढमो सुयक्खंधो समत्तो ()

◦ मुनि दीपरत्नसागरेण संशोधितः सम्पादित्तश्च पंचमं अज्झयणं समत्तं ◦

◦ बीओ सुयक्खंधो ◦

[] छट्ठं अज्झयणं/पढमं संवरदारं []

[३०] जंबू! एत्तो संवरदाराइं पंच वोच्छामि आणुपुव्वीए ।

जह भणियाणि भगवया सव्वदुहविमोक्खणट्ठाए ॥

[३१] पढमं होइ अहिंसा बितियं सच्चवयणंति पन्नत्तं ।

दत्तमणुण्णायसंवरो य बंभचेरमपरिग्गहत्तं च ॥

[३२] तत्थ पढमं अहिंसा तसथावरसव्वभूयखेमकरी ।

तीसे सभावणाए किंचि वोच्छं गुणुद्देसं ॥

[३३] ताणि उ इमाणि सुव्वया! महव्ववाइं लोकहिय-सव्वयाइं सुयसागर-देसियाइं तव-संजम-
महव्वयाइं सीलगुणवरव्वयाइं सच्चज्जवव्वयाइं नरग-तिरिय-मणुय-देवगति-विवज्जकाइं सव्वजिणसास-
णगाइं कम्मरयविदारगाइं भवसयविणासणकाइं दुहसयविमोयणकाइं सुहसयपवत्तकाइं कापुरिसदुरुत्तराइं
सप्पुरिसनिसेवियाइं निव्वाणगमणमग्ग-सग्गपणायगाइं संवरदाराइं पंच कहियाणि उ भगवया ।

तत्थ पढमं अहिंसा जा सा सदेवमणुयासुरस्स लोगस्स भवति दीवो ताणं सरणं गती पइट्ठा
निव्वाणं, निव्वुई, समाही, सत्ती, कित्ती, कंती, रती, य विरती, य सुयंग, तित्ती, दया, विमुत्ती, खंती,

समत्ताराहणा, महंती, बोही, बुद्धी धिती, समिद्धी, रिद्धी, विद्धी, ठिती, पुढी, नंदा, भद्दा, विसुद्धी, लद्धी, विसिद्धिदिद्धी, कल्लाणं, मंगलं, पमोओ, विभूती, रक्खा, सिद्धावासो, अणासवो, केवलीणं ठाणं, सिव, समिई, सील, संजमो, त्ति य सीलपरिघरो, संवरो, य गुत्ती, ववसाओ, उस्सओ, य जन्नो, आयतणं, जयण, मप्पमाओ, आसासो, वीसासो, अभओ, सव्वस्स वि अमाघाओ, चोक्ख, पवित्ता, सुती, पूया, विमल, पभासा, य निम्मलतर, त्ति एवमादीणि निययगुणनिम्मियाइं पज्जवणामाणि होंति अहिंसाए ।

[३४] एसा सा भगवती अहिंसा जा सा भीयाण पिव सरणं पक्खीणं पिव गमणं तिसियाणं पिव सलिलं खुहियाणं पिव असणं समुद्धमज्झे व पोतवहणं चउप्पयाणं व आसमपयं दुहट्टियाणं व ओसहिबलं अडवीमज्झे विसत्थगमणं एत्तो विसिद्धतरिका अहिंसा जा सा- पुढवि-जल-अगणि-मारुय-वणप्फइ-बीज-हरित-जलचर-थलचर-खहचर-तस-थावर-सव्वभूय-खेम-करी एसा भगवती अहिंसा जा सा- अपरिमियनाणदंसणधरेहिं सीलगुण-विणय-तव-संजम-नायकेहिं तित्थंकरेहिं सव्वजगवच्छलेहिं तिलोग-महिएहिं जिणचंदेहिं सुद्धु दिद्धा ओहिजिणेहिं विण्णाया उज्जुमतीहिं विदिद्धा विपुलमतीहिं विदित्ता पुव्वधरेहिं अधीता वेउव्वीहिं पतिण्णा ।

सुयक्खंधो-२, अज्झयणं-६

आभिणिबोहियनाणीहिं सुयनाणीहिं मणपज्जवनाणीहिं केवलनाणीहिं आमोसहिपत्तेहिं खेलोस-हिपत्तेहिं जल्लोसहपत्तेहिं विप्पोसहिपत्तेहिं सव्वोसहिपत्तेहिं बीजबुद्धीहिं कोट्टबुद्धीहिं पदाणुसारीहिं संभिण्ण-सोतेहिं सुयधरेहिं मणबलिएहिं वयबलिएहिं कायबलिएहिं नाणबलिएहिं दसणबलिएहिं चरित्तबलिएहिं खीरा-सवेहिं महुआसवेहिं सप्पिआसवेहिं अक्खीणमहानसिएहिं चारणेहिं विज्जाहरेहिं चउत्थभत्तिएहिं छद्धभत्तिएहिं एवं जाव छम्मासभत्तिएहिं उक्खित्तचरणेहिं निक्खित्तचरणेहिं अंतचरणेहिं पंतचरणेहिं लूहचरणेहिं समुदाण-चरणेहिं अण्णइलाएहिं मोणचरणेहिं ।

संसद्धकप्पिएहिं तज्जायसंसद्धकप्पिएहिं उवनिहिएहिं सुद्धेसणिएहिं संखादत्तिएहिं दिद्धला-भिएहिं अदिद्धलाभिएहिं पुद्धलाभिएहिं आयंबिलिएहिं पुरिमइडिएहिं एक्कासणिएहिं निव्वित्तिएहिं भिण्ण-पिंडवाइएहिं परिमियपिंडवाइएहिं अंताहारेहिं पंताहारेहिं अरसाहारेहिं विरसाहारेहिं लूहाहारेहिं तुच्छाहा-रेहिं अंतजीवीहिं पंतजीवीहिं लूहजीवीहिं तुच्छजीवीहिं उवसंतजीवीहिं पसंतजीवीहिं विवित्तजीवीहिं अक्खी रमहु-सप्पिएहिं अमज्जमंसासिएहिं ठाणाइएहिं पडिमइआईहिं ठाणुकडिएहिं वीरासणिएहिं नेसज्जिएहिं इंडाइएहिं लगंडसाइहिं एगपासगेहिं आयावएहिं अप्पाउएहिं अणिद्धुभएहिं अकंडूयएहिं धुतकेस-मंसु-लोमनखेहिं सव्वगायपडि-कम्मविप्पमुक्केहिं समणुचिण्णा सुयधर-विदिततत्थ-कायबुद्धीहिं धीरमति-बुद्धिणो य जेण ते आसीविय-उग्गतेयकप्पा निच्छय-ववसाय-पज्जत्तकय-मतीया निच्चं सज्झायज्झाण-अनुबद्ध-धम्मज्झाणा ।

पंचमहव्वयचरित्तजुत्ता समिता समितीसु समितपावा छव्विहजगवच्छला निच्चमप्प-मत्ता एहिं अण्णेहिं य जा सा अनुपालिया भगवती इमं च पुढवि-दग-अगणि-मारुय-तरुण-तस-थावर-सव्व-भूयसंजमदयद्वयाए सुद्धं उंछं गवेसियव्वं अकतमकारित-माणहूय-मणुद्धिं अकीयकडं नवहि य कोडीहिं सुपरिसुद्धं दसहि य दोसेहिं विप्पमुक्कं उग्गमउप्पायणे-सणासुद्धं ववगय-चुय-चइय-चत्तदेहं च फासुयं च न निसज्जकहापओयणक्खासुओवणीयं न तिगिच्छा-मंत-मूल-भेसज्जहेउं न लक्खणुप्पया-सुमिण-जोइस-निमित्त-कहकुहकप्पउत्तं ।

नवि डंभणाए नवि रक्खणाते नवि सासणाते नवि डंभण-रक्खण-सासणाते भिक्खं गवेसि-यव्व नवि वंदमाते नवि माणणाते नवि पूयणाते नवि वंदण-माणण-पूयणाते भिक्खं गवेसियव्वं नवि

हीलणाते नवि निंदणाते नवि गरहणाते नवि हीलण-निंदण-गरहणाते भिक्खं गवेसियव्वं नवि भेसणाते नवि तज्जणाते नवि तालणाते नवि भेसण-तज्जण-तालणाते भिक्खं गवेसियव्वं नवि गारवेणं नवि कुहणयाते नवि वणीमयाते नवि गारव-कुहण-वणीमयाते भिक्खं गवेसियव्वं नवि मित्तयाए नवि पत्थणाए नवि सेवणाए नवि मित्तत्त-पत्थण-सेवणाते भिक्खं गवेसियव्वं अण्णाए अगढिए अदुट्ठे अदीणे अविमणे अकलुणे अविसाती अपरितंतजोगी जयण-घडण-करण-चरिय-विणय-गुण-जोगसंपउत्ते भिक्खू भिक्खेसणाते निरते, इमं च सव्वजागजीव-रक्खणदयट्ठाए पायवणं भगवया सुकहियं अत्तहियं पेच्चाभावियं आगमेसिभद्वं सुद्धं नेयाउयं अकुडिलं अनुत्तरं सव्वदुक्खपावाण विओसमणं ।

[३५] तस्स इमा पंच भावणाओ पढमस्स वयस्स होंति पाणातिवायवेरमणपरिक्खणट्ठायाए पढमं-ठाणमगुणजोगजुंजण-जुगंतरनिवातियाए दिट्ठीए हरियव्वं कीडपयंग-तस-थावर-दयावरेण निच्चं पुप्फ-फल-तय-पवाल-कंद-मूलदगमद्विय-बीज-हरिय-परिवज्जएणं सम्मं, एवं खलु सव्वापाणा न हीलियव्वा न निंदियव्वा न गरहियव्वा न हिंसियव्वा न छिंदियव्वा न भिंदियव्वा न वहेयव्वा न भयं दुक्खं च किंचि लब्भा पावेउं एवं इरियासमितिजोगेणं भावितो भवति अंतरप्पा असबलमसंकिलिद्ध-निव्व-
सुयक्खंधो-२, अज्झयणं-६

ण-चरित्तभावणाए अहिंसए संजए सुसाहू,

बितियं-मणेणं पावेणं पावगं अहम्मियं दारुणं निस्संसं वह-बंध-परिकिलेसबहुलं भय-मरण-परिकिलेससंकिलिद्धं न कयावि मणेणं पावएणं पावगं किंचि वि ज्ञायव्वं एवं मणसमितिजोगेणं भावितो भवति अंतरप्पा असबलमसंकिलिद्ध-निव्वण-चरित्तभावणाए अहिंसए संजए सुसाहू,

ततियं च-वतीते पावियाते पावगं न किंचि वि भासियव्वं एवं वतिसमितिजोगेण भावितो भवति अंतरप्पा असबलमसंकिलिद्ध-निव्वण-चरित्त-भावणाए अहिंसओ संजओ सुसाहू, चउत्थं-आहारए-सणाए सुद्धं उच्छं गवेसियव्वं अण्णाए अगढिए अदुट्ठे अदीणे अविमणे अकलुणे अविसादी अपरितंतजोगी जयण-घडण-करण-चरिय विणयगुण जोग संपओग जुत्ते भिक्खु भिक्खेसणाते जुत्ते समुदाणेऊण भिक्ख-चरियं उच्छं धेत्तूण आगते गुरुजणस्स पासं गमणागमणातिचार-पडिक्कमण-पडिक्कंते आलो-यण-दायणं च दाऊण गुरुजणस्स जहोवएसं निरइयारं च अप्पमत्तो, पुणरवि अणेसणाए पयतो पडिक्कमित्ता पसंत-आसी-णसुहणिसण्णे मुहुत्तमेत्तं च ज्ञाण-सुहजोग-नाण-सज्झाय-गोवियमणे धम्ममणे अविमणे सुहम-णे अविग्ग-हमणे समाहिमणे सद्धासंवेगनिज्जरमणे पवयणवच्छल्लभावियमणे उट्ठेऊण य पहट्ठतुट्ठे जह-राइणियं निमंतइत्ता य साहवे भावओ य विइण्णे य गुरुजणेणं उपविट्ठे संपमज्जिऊण ससीसं कायं तहा करतलं ।

अमुच्छिए अगिद्धे अगढिए अगरहिए अणज्झोववण्णे अणाइले अलुद्धे अणत्तट्ठित्तै असुरसुरं अचवचवं अदुयमविलंबियं अपरिसाडिं आलोयभायणे जयं पयत्तेणं ववगयसंजोगमणिगालं च विगयधूमं अक्खोवंजण-वणाणुलेवणभूयं संजमजायामायानिमित्तं संजयभारवहणट्ठायाए भुंजेज्जा पाणधारणट्ठायाए संजए णं समियं एवं आहारसमितिजोगेणं भाविओ भवति अंतरप्पा असबलमसंकिलिद्ध-निव्वण-चरित्तभावणाए अहिंसए संजए सुसाहू

पंचमं आदान-निक्खेवण-समिई पीढ-फलग-सिज्जा-संथारग-वत्थ-पत्त-कंबल-दंडग-रयहरण-चोलपट्टग-मुहपोत्तिग-पायपुंछणादी एयंपि संजमस्स उवबूहणट्ठायाए वाततव-दंसमसगसीय-परिक्ख-णट्ठायाए उवगरणं रागदोसरहियं परिहरितव्वं संजतेणं निच्चं पडिलेहण-पप्फोडण-पमज्जणाए अहो य राओ य

अप्पमत्तेणं होइ समयं निक्खिवियव्वं च निण्हियव्वं च भायणं-भंडोवहि-उवगरणं एवं आयाणभंड-
निक्खेवणासमितिजोगेणं भाविओ भवति अंतरप्पा असबलमसंकिलिद्ध-निव्वण-चरित्तभावणाए अहिंसए
संजते सुसाहू ।

एवमिणं संवरस्स दारं सम्मं संवरियं होति सुप्पणिहियं इमेहिं पंचहि वि कारणेहिं मण-
वयण-काय-परिक्खएहिं निच्चं आमरणंतं च एस जोगो नेयव्वोधितिमया मतिमया अणासवो अकलुसो
अच्छिद्धो अपरिसावी असंकिलिद्धो सुद्धो सव्वजिणमणुण्णातो । एवं पढमं संवरदारं फासियं पालियं सोहियं
तीरियं किट्टियं आराहियं आणाते अणुपालियं भवति एवं नायमुणिणा भगवया पन्नवियं पसिद्धं सिद्धं
सिद्धवरसासणमिणं आघवितं सुदेसितं पसत्थं पढमं संवरदारं समत्तं ।

• बीए सुयक्खंधे छट्ठं अज्झयणं/पढमं संवरदारंसमत्तं •

• मुनि दीपरत्नसागरेण संशोधितः सम्पादित्तश्च छट्ठं अज्झयणं समत्तं •

□ सत्तमं अज्झयणं/बीयं संवरदारं □

[३६] जंबू! बितियं च सच्चवयणं सुद्धं सुइयं सिवं सुजायं सुभासियं सुव्वयं सुकहियं
सुयक्खंधो-२, अज्झयणं-७

सुदिट्ठं सुपत्तिट्ठियं सुपत्तिट्ठिजसं सुसंजमियवयणबुइयं सुरवर-नरवसभ-पवर-बलवग-सुविहियजम-बहुमयं
परमसाहुधम्मचरणं तव-नियम-परिग्गहियं सुगति पहदेसगं च लोगुत्तमं वयमिणं विज्जाहरगगणगमण-
विज्जाण साहकं सग्गमग्ग सिद्धिपहदेसकं अवितहं तं सच्चं उज्जुयं अकुडिलं भूयत्थं अत्थतो विसुद्धं
उज्जोयकरं पभासकं भवति सव्वभावण जीवलोगे अविसंवादि जहत्थमधुरे पच्चक्खं दइवयं व जं तं
अच्छेरकारकं अवत्थंतरेसु बहुपएसु माणुसाणं सच्चेणं महासमुद्धमज्झे चिट्ठंति न निमज्जंति मूढाणिया वि
पोया सच्चेण य उदगसंभमंमि वि न बुज्झइ न य मरंति थाहं च ते लभंति सच्चेण य अगणिसंभ-
मंमि वि न डज्झंति उज्जुगा मणूसा सच्चेणं य तत्ततेल्ल-तउय-लोह-सीसकाइं छिवंति धरंति न य
डज्झंति मणूसा पव्वयकडकाहिं मुच्चंते न य मरंति सच्चेणं परिग्गहिया असिपंजरगया समराओ वि निइंति
अणहा य सच्चावादी वहबंधभियोगवेरघोरेहिं पमुच्चंति य अमित्तमज्झाहिं निइंति अणहा य सच्चवादी
सादेव्वाणि य देवयाओ करंति सच्चवयणे रताणं ।

तं सच्चं भगवं तित्थगरुभासियं दसविहं चोद्धसपुव्वीहिं पाहुडत्थविदितं महरिसीण य सम-
प्पदिण्णं देविंद-नरिंद-भासियत्थं वेमाणियसाहियं महत्थं मंतोसहिविज्ज-साहणट्ठं चारणगण-समण-
सिद्धविज्जं मणुयगणाणं च वंदणिज्जं अमरगणाणं च अच्छणिज्जं असुरगणाणं च पूयणिज्जं अणेगपासंड-
परिग्गहियं जं तं लोकंमि सारभूयं गंभीरतरं महासमुद्धाओ थिरतरगं मेरुपव्वयाओ सोमतरं चंदमंडलाओ
दित्ततरं सूरमंडलाओ विमलतरं सरयनहयलाओ सुरभितरं गंधमादणाओ जे वि य लोगम्मि अपरिसेसा
मंता जोगा जवा य विज्जा य जंभका य अत्थाणि य सत्थाणि य सिक्खाओ य आगमा य सव्वाणि वि
ताइं सच्चे पइट्ठियाइं, सच्चंपि य संजमस्स उवरोहकारकं किंचि न वत्तव्व-हिंसा-सावज्जसंपउत्तं भेय-
विकहकारकं अणत्थवाय-कलहकारकं अणज्जं अववाय-विवायसंपउत्तं वेलबं ओजधेज्जबहुलं निलज्जं
लोयगरहणिज्जं दुदद्धिं दुस्सुयं दुम्मुणियं अप्पणो थवणा परेसु निंदानसिं मेहावी न तंसि धण्णो नसि
पियधम्मो न तं कुलीणो न तंसिदाणपती न तंसि सूरु नसि पडिरूवो न तंसि लट्ठो न पंडिओ न बहुस्सुओ

न वि य तं तवस्सी न यावि परलोगणिच्छियमतीऽसि सव्वकालंजाति-कुल-रूव-वाहि-रोगेण वा वि जं होइ वज्जणिज्जं दुहिलं उवयारमतिकंतं-एवंविहं सच्चंपि न वत्तव्वं ।

अह केरिसकं पुणाइं सच्चं तु भासियव्वं? जं तं दव्वेहिं पज्जवेहि य गुणेहिं कम्महेहिं सिप्पेहिं आगमेहि य नामक्खया-निवाओवसग्ग-तद्धिय-समास-संधि-पद-हेउ-जोगिय-उणादि-किरिया-विहाण-धातु-सर-विभत्ति-वण्णजुत्तं तिकल्लं दसविहं पि सच्च जह भणियं तह य कम्मणा होइ दुवालसविहा होई भासा वयणंपि य होइ सोलसविहं, एवं अरहंतमणुण्णायं समिक्खियं संजएणं कालम्मि य वत्तव्वं ।

[३७] ईमं च अलिय-पिसुण-फरुस-कडुय-चवल-वयण-परिक्खणद्वयाए पावयणं भगवया सुकहियं अत्तहियं पेच्चाभाविकं आगमेसिभद्वं सुद्धं नेयाउयं अकुडिलं अनुत्तरं सव्वदुक्खपावाण विओसमणं तस्स इमा पंच भावणाओ बितियस्स वयस्स अलियवयणवेरमण-परिक्खणद्वयाए ।

पढमं-सोऊणं संवरद्वं परमद्वं सुद्धं जाणिऊण न वेगियं न तुरियं न चवलं न कडुयं न फरुसं न साहसं न य परस्स पीलाकरं सावज्जं सच्चं च हियं च मियं च गाहकं च सुद्धं संगयमकाहलं च समिक्खितं संजतेणं कालम्मि य वत्तव्वं एवं अनुवीइसमितिजोगेण भाविओ भवति अंतरप्पा संजय-कर-चरण-नयणवयणो सूरु सच्चज्जव-संपन्नो ।

बितियं-कोहो ण सेवियव्वो, कुद्धो चंडिक्किओ मणूसो अलियं भणेज्ज पिसुणं भणेज्ज सुयक्खंधो-२, अज्झयणं-७

फरुसं भणेज्ज अलियं पिसुणं फरुसं भणेज्ज कलहं करेज्जा वेरं करेज्जा विकहं करेज्जा कलहं वेरं विकहं करेज्जा सच्चं हणेज्ज सीलं हणेज्ज विनयं हणेज्ज सच्चं सीलं विनयं हणेज्ज वेसो भवेज्ज वत्थुं भवेज्ज गम्मो भवेज्ज वेसो वत्थुं गम्मो भवेज्ज एयं अण्णं च एवमादियं भणेज्ज कोहग्गि-संपलित्तो तम्हा कोहो न सेवियव्वो, एवं खंतीए भाविओ भवति अंतरप्पा संजय-कर-चरण-नयण-वयणो सूरु सच्चज्जवसंपन्नो

ततियं-लोभो न सेवियव्वो लुद्धो लोलो भणेज्ज अलियं खोत्तस्स व वत्थुस्स व कएण, लुद्धो लोलो भणेज्ज अलियं कित्तीए व लोभस्स व कएण, लुद्धो लोलो भणेज्ज अलियं इड्डीए व सोक्खस्स व कएण, लुद्धो लोलो भणेज्ज अलियं भत्तस्स व पाणस्स कएण, लुद्धो लोलो भणेज्ज अलियं पीढस्स व फलगस्स व कएण, लुद्धो लोलो भणेज्ज अलियं सेज्जाए व संथारकस्स व कएण, लुद्धो लोलो भणेज्ज अलियं वत्थस्स व पत्तस्स व कएण, लुद्धो लोलो भणेज्ज अलियं कंबलस्स य पायपुंछणस्स व कएण, लुद्धो लोलो भणेज्ज अलियं सीसस्स व सिस्सिणीए व कएण, लुद्धो लोलो भणेज्ज अलियं अण्णेसु य एवमादिणसु बहुसु कारणसतेसु, लुद्धो लोलो भणेज्ज अलियं तम्हा लोभो न सेवियव्वो, एवं मुत्तीए भाविओ भवति अंतरप्पा संजय-कर-चरण-नयण-वयणो सूरु सच्चज्जवसंपन्नो

चउत्थं-न भाइयव्वं भीतं खु भया अइंति लहुयं भीतो अबितिज्जओ मणूसो भीतो भूतेहिं व धेपेज्जा भीतो अण्णं पि हु भेसेज्जा भीतो तव-संजमं पि हु मुएज्जा भीतो य भर न नित्थरेज्जा सप्पुरिसनिसेवियं च मग्गं भीतो न समत्थो अनुचरिउं तम्हा न भाइयव्वं भयस्स वा वाहिस्स वा रोगस्स वा जराए वा मच्चुस्स वा अण्णस्स व एवमादियस्स एवं धेज्जेणं भाविओ भवति अंतरप्पा संजय-कर-चरण-नयण-वणो सूरु सच्चज्जवसंपन्नो,

पंचमकं-हासं न सेवियव्वं अलियाइं असंतकाइं जंपंति हासइत्ता परपरिभवकारणं च हासं परपरिवायप्पियं च हासं परपीलाकारणं च हासं भेदविमुत्तिकारकं च हासं अण्णोण्णजणियं च होज्ज हासं अण्णोण्णगमणं च होज्ज मम्मं अण्णोण्णगमणं च होज्ज कम्मं कंदप्पाभिओगगमणं च होज्ज हासं

आसुरियं किञ्चिस्तत्तणं च जणेज्ज हासं तम्हा हासं न सेवियत्वं एवं मोणेण भाविओ भवइ अंतरप्पा संजय-कर-चरण-नयण-वणोसूरो सच्चज्जवसंप्पणो, एवमिणं संवरस्स दारं सम्मं संवरियं होइसुप्पणिहियं ।

इमेहिं पंचहिं वि कारणेहिं मण-वयण-काय-परिक्खिएहिं निच्चं आमरणंतं च एस जोगो नेयव्वो धितिमया मतिमया अणासवो अकलुसो अच्छिद्धो अपरिस्सावी असंकिलिद्धो सुद्धो सव्वजिणम-पुण्णाओ एवं बितियं संवरदारं जहा- पढमं जाव समत्तं त्ति बेमि ।

• बीए सुयक्खंधे सत्तमं अज्झयणं/बीयं संवरदार समत्तं •

• मुनि दीपरत्नसागरेण संशोधितः सम्पादित्तश्च सत्तमं अज्झयणं समत्तं •

[] अढमं अज्झयणं/तइयं संवरदारं []

[३८] जंबू! दत्ताणुण्णायसंवरो नाम होति ततियं-सुव्वता! महव्वतं गुणव्वतं परदव्वहरण-पडिविरइकरणजुत्तं अपरिमियमणंततण्हामणुगय-महिच्छ-मणवयणकलुस-आयाणसुनिग्गहियं सुसंजमियमण-हत्थ-पायनिहुयं निग्गथं नेट्टिकं निरुत्तं निरासवं निब्भयं विमुत्तं उत्तमनरवसभ-पवरबलवग-सुविहियजण-समंतं परमसाहुधम्मचरणं जत्थ य गामागर-जाव पट्टणासमगयं च किंचि दव्वं मणि-मुत्त-जाव रयणमादिं पडियं पम्हुट्ठं विप्पणट्ठं न कप्पति कस्सति कहेउं वा गेण्हिउं वा अहिरण्ण-सुवण्णिकेणं समलेट्ठु-कंच-सुयक्खंधो-२, अज्झयणं-८

णेणं अपरिग्गहसंवुडेणं लोगंमि विहरियत्वं ।

जं पि य होज्जा हि दव्वजातं खलगतं खेत्तगतं रण्णमंत-रगतं व किंचि पुप्फ-फल-जाव सक्कराइं अप्पं वा बहुं वा अणुं वा थूलगं वा न कप्पति ओग्गहंति अदिण्णंमि गिण्हिउं जे हणि हणि ओग्गहं अनुण्णविय गेण्हियत्वं वज्जेयव्वो य सव्वकालं अचियत्त घरप्पवेसो अचियत्तभत्तपाणं अचियत्त-पीढ-फलग-जाव उवकरणं परपरिवाओ परस्स दोसो परववएसेणं जं च गेण्हइ परस्स नासेइ जं च सुकायं दाणस्स य अंतरातियं दाणविप्पणासो पेसुन्नं चेव मच्छरित्तं च ।

जे वि य पीढ-फलग-जाव उवकरणं असंविभागी असंगहरुई तवतेणे य वइतेणे य रूवतेणे य आयारे चेव भावतेणे य सद्धकरे झंझकरे कलहकरे वेरकरे विकहकरे असमाहिकारके सया अप्पमाण भोई सततं अनुबद्धवेरे य निच्चरोस से तारिसए नाराहए वयमिणं अह केरिसए पुणाइं आराहए वयमिणं?

जे से उवहि-भत्तपाण-दाण-संगहण-कुसले अच्चंत-बाल-दुब्बल-गिलाण-वुड्ढ-खमके पवत्ति-आयरिय-उवज्झाए सेहे साहम्मिए तवस्सी-कुल-गण-संघ-चेइयट्ठे य निज्जरट्ठी वेयावच्चं अणिस्सियं दसविहं बहुविहं करेति, न य अचियत्तस्स घरं पविसइ न य अचियत्तस्स गेण्हइ भत्तपाणं न य अचियत्तस्स सेवइ पीढ-फलग-जाव उवकरणं-न य परिवायं परस्स जंपत्ति ण यावि दोसे परस्स गेण्हति परववएसेणवि न किंचि गेण्हति न य विपरिणामेति कंचि जणं न यावि नासेति दिण्ण-सुकयं दाऊण य काऊण य न होइ पच्छाताविए संविभागसीले संगहोवग्गहकुसले से तारिसए आराहए वयमिणं ।

इमं च परदव्वहरणवेरमण-परिक्खणट्ठयाए पावयणं भगवया सुकहियं अत्तहियं पेच्चाभावि-कं आगमेसिभद्धं सुद्धं नेयाउयं अकुडिलं अनुत्तरं सव्वदुक्ख-पावाण विओसमणं, तस्स इमा पंच भावणा ततियस्सवतस्स होंति परदव्वहरणवेरमण-परिक्खणट्ठयाए ।

पढमं-देवकुल-सभ-प्पवा-आवसह-रुक्खमूल-आराम-कंदरा-आगर-गिरि-गुह-कम्मंत-उज्जाण-
जाणसाल-कुवित-साल-मंडव-सुण्णघर-सुसाण-लेण-आवणे अण्णंमि य एवमादियंमि दगमट्टि-बीज-हरित-
तसपाण-असंसत्ते अहाकडे फासुए विवित्ते पसत्थे उवस्सए होइ विहरिच्चं आहाकम्मं-बहुले य जेस
आसित्त-संमज्जिओसित्त-सोहिय-छायण-दुमण-लिंपण-अनुलिंपण-जलण-भंडचालण अंतो बहिं च असंजमो
जत्थ वट्ठती संजयाण अट्ठा वज्जेयव्वे हु उवस्सए से तारिसए सुत्तपडिकुट्ठे, एवं विवित्तवासवसहिसमिति-
जोगेणं भावितो भवति अंतरप्पा निच्चं अहिकरण-करण-कारावण-पावकम्मविरते दत्ताणुण्णाय-ओग्गहरुई,

बितियं-आरामुज्जाण-काननवणप्पदेसभागे जं किंचि इक्कडं व कट्ठिणगं वल जंतुगं व परा-
मेरा-कुच्च-कुस-डब्भ-पलाल-मूयग-वल्लय-पुप्प-फल-तय-प्पवाल-कंद-मूल-तण-कट्ठ-सक्कराईं गेणहइ
सेज्जोवहिस्स अट्ठा न कप्पए ओग्गहे अदिन्नंमि गेण्हिउं जे हणिहणि ओग्गहं अनुण्णविय गेण्हियव्वं एवं
ओग्गहसमितिजोगेण भावितो भवति अंतरप्पा निच्चं जाव ओग्गहरुई ।

ततियं-पीढ-फलग-सेज्जा-संधारगड्डयाए रुक्खा न छिंदियव्वा न य छेदणेण भेयणेण य
सेज्जा कारेयव्वा जस्सेव उवस्सए वसेज्ज सेज्जं तत्थेव गवेसेज्जा न य विसमं समं करेज्जा न निवाय-
पवाय-उस्सुकत्तं उ डंसमसगेसु खुभियव्वं अग्गी धूमो य न कायव्वो एवं संजमबहुले संवरबहुले संवुडबहुले
समाहिबहुले धीरे काएण फासयंतो सययं अज्झप्पज्झाणजुत्ते समिए एगे चरेज्ज धम्मं एवं सेज्जासमिति-
जोगेण भावितो भवति अंतरप्पा जाव ओग्गहरुई,

चउत्थं-साहारणपिंडपातलाभे भोत्तव्वं संजएणं समियं न सायसूयाहिकं न खद्धं न वेइयं न
सुयक्खंधो-२, अज्झयणं-८

तुरियं न चवलं न साहसं न य परस्स पीलाकरं सावज्जं तह भोत्तव्वं जह से ततियवयं न सीदति साहार-
णपिंडवायलाभे सुहुमं अदिन्नादाणवय-नियम-वेरमणं, एवं साहारणपिंडवायलाभे समितिजोगेण भावितो
भवति अंतरप्पा जाव ओग्गहरुती,

पंचमगं-साहम्मिएसु विणओ पंजियव्वो उवकारण-पारणासु विणओ पंजियव्वो वायण-
परियट्ठणासु विणओ पंजियव्वो दाण-गहण-पुच्छणासु विणओ पंजियव्वो निक्खमण-पवेसणासु विणओ
पंजियव्वो अण्णेसु य एवमाइएसु बहुसु कारणएसु विणओ पंजियव्वो, विणओ वि तवो तवो वि धम्मो
तम्हा विणओ पंजियव्वो गुरुसु साहूसु तवस्सीसु य, एवं विणएण भाविओ भवति अंतरप्पा जाव
ओग्गहरुई ।

एवमिणं संवरस्स दारं सम्मं संवरियं होइ सुपणिहियं एवं जाव आघवियं सुदेसितं पसत्थं ।
एवं ततियं संवरदारं जाव समत्तं त्ति बेमि ।

• बीए सुयक्खंधे अट्ठमं अज्झयणं/तइयं संवर दारं समत्तं •

• मुनि दीपरत्नसागरेण संशोधितः सम्पादित्तश्च अट्ठमं अज्झयणं समत्तं •

□ नवमं अज्झयणं/चउत्थं संवरदारं □

[३९] जंबू! एत्तो य बंभचेरं-उत्तम-तव-नियम-नाण-दंसण-चरित्त-समत्त-विणयमूलं जम-
नियम-गुणप्पहाणजुत्तं हिमवंत-महंत-तेयमंतं पसत्थ-गंभीर-थिमित-मज्झं अज्जवसाहुजणाचरितं मोक्ख-
मग्गं विसुद्ध-सिद्धिगति-निलयं सासयमव्वाबाहमपुणब्भवं पसत्थं सोमं सुभं सिवमचल-मक्खयकरं जतिवर-
सारक्खियं सुचरियं सुसाहियं नवरि मुणिवरेहिं महापुरिस-धीर-सूर-धम्मिय-धितिमंताण य सया विसुद्धं भव्वं

भव्वजणाणुचिण्णं निस्संकिंयं निब्भयं नित्तुसं निरायासं निरुवलेवं निव्वुतिघरं नियम-निप्पकंपं तवसं-जममूलदलियं-नेम्मं पंचमहव्वयसुरक्खियं समितिगुत्तिगुत्तं झाणवरकवाडसुकयं अज्झप्पदिण्णफलिहं सण-द्धोत्थइय-दुग्गइपहं सुग्गतिपहदेसगं लोगुत्तमं च वयमिणं पउमसरतलागपालिभूयं महासगडअरगतुंबभूयं महाविडिमरुक्खकखंधभूयं महानगरपागारकवाडफलिहभूयं रज्जुपिणद्धो व इंदकेतू विसुद्धणेगगुणसंपिणद्धं जंमि य भग्गंमि होइ सहसा सव्वं संभग्ग-मथिय-चुण्णिय-कुसल्लिय-पल्लट्ट पडिय-खंडिय-परिसडिय-विणासियं विनयसीलतव-नियमगुमसमूहं तं बंभं-भगवंतं-गहगण-नक्खत्त-तारगाणं वा जहा- उड्डुपती मणि-मुत्त-सिलप्पवाल-रत्तरयणागराणं च जहा- समुद्धो वेरुलिओ चेव जह मणीणं जह मउडो चेव भूसणाणं वत्थाणं चेव खोमजुयलं अरविंदं चेव पुप्फजेट्टं गोसीसं चेव चंदणाणं ।

हिमवंतो चेव ओसहीणं सीतोदा चेव निन्नगाणं उदहीसु जहा- सयंभुरमणो रूयगवरे चेव मंडलिकपव्वयाण पवरे एरावण इव कुंजराणं सीहो व्व जहा- मिगाणं पवरो पवकाणं चेव वेणुदेवे धरणो जह पन्नगइंदराया कप्पाणं चेव बंभलोए सभासु य जहा- भवे सुहम्मा ठितिसु लवसत्तम व्व पवरा दाणाणं चेव अभयदाणं किमिराओ चेव कंबलाणं संघयवणे चेव वज्जरिसभे संठाणे चेव समचउरंसे झाणेसु य परमसुक्कज्झाणं नाणेसु य परमकेवलं तु सिद्ध लेसासु य परमसुक्कलेस्सा तित्थकरो चेव जह मुणीणं वासेसु जहा- महाविदेहे गिरिया चेव मंदरवरे वणेसु जह नंदनवणंपवरंदु मेसु जह जंबू सुदंसणा वीसुयजसा-जीसे नामेण य अयं दीवो, तुरगवती गयवती रहवती नरवती जह वीसुए चेव राया रहिए चेव जहा- महारहगते एवमाणेगा गुणा अहीणा भवंति एककंमि बंभचरे जंमि य आराहियंमि आराहियंवयमिणं सुयक्खंधो-२, अज्झयणं-९

सव्वं सीलं तवो य विणओ य संजमो य खंती गुत्ती मुत्ती तहेव इहलोइय-पारलोइय-जसो य कित्ती य पच्चओ य तम्हा निहुएणं बंभचरं चरियव्वं सव्वओ विसुद्धं जावज्जीवाए जाव सेयद्विसंजओत्ति-एवं भणियं वयं भगवया तं च इमं ।

[४०] पंचमहव्वय-सुव्वयमूलं समणमणाइलसाहुसुचिण्णं ।

वेरविरामण-पज्जवसाणं सव्वसमुद्ध-महोदधितित्थं ॥

[४१] तित्थकरेहि सुदेसियमग्गं नरयतिरिच्छविवज्जियमग्गं ।

सव्वपवित्त-सुनिम्मियसारं सिद्धिविमाण-अवंगुयदारं ॥

[४२] देवनरिंदनमंसियपूयं सव्वजगुत्तममंगलमग्गं ।

दुद्धरिसं गुणनायगमेक्कं मोक्खपहस्स विसकभूयं ॥

[४३] जेण सुद्धचरिएण भवइ सुबंभणो सुसमणो सुसाहू स इसी स मुणी स संजए स एव भिक्खू जो सुद्धं चरित बंभचरं, इमं च रति-राग-दोस-मोह-पवइढणकरं किंमज्झ-पमायदोस-पासत्थसील-करणं अब्भंगणाणि य तेल्लमज्जणाणि य अभिक्खणं कक्खसीसकरचरणवदण-धोवण-संबाहण-गायकम्म-परिमद्धण-अनुलेवम-चुण्णवास-धूवण-सरीरपरिमंडण-बाउसिक-हसिय-भणिय-नट्टगीयवाइयनडनट्टकजल्ल-महल्लपेच्छण-वेलंबक जाणि य सिंगारागाराणि य अण्णाणि य एवमादियाणि तव-संजम-बंभचर-घतोव-घातियाइं अनुचरमाणेणं बंभचरं वज्जेयव्वाइं सव्वकालं भावेयव्वो भवइ य अंतरप्पा इमेहिं तव-नियम-सील-जोगेहिं निच्चकालं किं ते-अण्हाणक-ऽदंत-धोवम-सेयमलजल्लधारण-मूणवय-केसलोय-खम-दम-अचेलगा-खुप्पिवास-लाघव-सितो-सिण कट्टेज्ज-भूमिनिसेज्ज-परघरपवेस-लद्धावलद्ध-माणावमाण-निंदण-दंसमसगफास-नियम-तव-गुण-विणयमादिएहिं जहा- से थिर तरगं होइ बंभचरं इमं च अबंभचरविरमण-

परिरक्खणद्वयाए पावयणं भगवया सुकहियं अत्तहितं पेच्चाभाविकं आगमेसिभदं सुद्धं नेयाउयं अकुडिलं अनुत्तरं सव्वदुक्खपावाण विओसवणं तस्स इमा पंच भावणाओ चउत्थवयस्स होंति अबंभचेरवेरमण परिरक्खणद्वयाए ।

पढमं- सयणासण-घरदुवारअंगण-आगास-गवक्ख-साल-अभिलोयण-पच्छ-वत्थुक-पसाहण-कण्हाणिकावकासा अवकासा जे य वेसियाणं अच्छंति य जत्थ इत्थिकाओ अभि-क्खणं मोह-दोस-रति-रागवड्ढणीओ कहिति य कहाओ बहुविहाओ ते हु वज्जणिजजा इत्थिसंसत्त संकिलिद्धा अण्णे वि य एवमादी अवकासा ते हुवज्जणिजजा जत्थ मणोविब्भमो वा भंगो वा भंसणा वा अट्ठं रुद्धं च होज्ज झामं तं तं वज्जेज्ज वज्जाभीरू अणायतणं अंतपंतवासी एवमसंसत्तवास-सहीसमितिजोगेण भावितो भवति अंतरप्पा आरतमण विरयगामधम्म जितेंदिए बंभचेरगुत्ते,

बितियं- नारीजणस्स मज्झे कहेयव्व कहा-विचित्ता विब्बोय-विलास-संपउत्ता-हास-सिंगार-लोइयकहव्व मोहजणणी न आवाह-विवाह-करकहा इत्थीणं वा सुभग-दुब्भग-कहा चउसट्ठिं च महिला गुणा न वण्ण-देस-जाति-कुल-रूव-नाम-नेवत्थ-परिजणकहव्व इत्थियाणं अण्णा वि य एवमादियाओ कहाओ सिंगारकलुणाओ तव-संजम बंभचेर-घातोवधातियाओ अनुचरमाणेण बंभचेरं न कहेयव्वा न सुणेयव्वा न चिंतेयव्वा एवं इत्थीकहविरतिसमितिजोगेण भावितो जाव बंभचेरगुत्ते,

ततियं-नारीण हसिय-भणियं चेड्डिय-विप्पेक्खिय-गइ-विलास-कीलियं विब्बोइय-नट्ट-गीत-

वाइय-सरीरसं-ठाम-वण्ण-कर-चरण-नयण-लावण्ण-रूव-जोवण्ण-पयोहर-अधर-वत्थ-अलंकार-

सुयक्खंधो-२, अज्झयणं-९

भूसणाणि य गुज्झोकासियाइं अण्णाणि य एवमादियाइं तव-संजम-बंभचेर-घातोवधातियाइं अनुचरमाणेण बंभचेरं न चक्खुसा न मणसा न वयसा पत्थेयव्वाइं पावकम्माइं एवं इत्थीरूवविरतिसमितिजोगेण जाव बंभचेरगुत्ते,

चउत्थं-पुव्वरय-पुव्वकीलिय-पुव्वसग्गंथ-गंथ-संथुया जे ते आवाह-विवाह-चोल्लकेसु य तिथिसु जण्णेसु उस्सवेसु य सिंगार-गार-चारुवेसाहिं इत्थीहिं हाव-भाव-पललिय-विकखेवं-विलास-सालिणीहिं अनुकूलपेम्मिकाहिं सद्धिं अनुभूया सयण-संपओगा उदुहुस-वरकुसुम-सुरभिचंदण-सुगंधिवर-वास-धूव-सुहफ-रिस-वत्थ-भूसणगुणोववेया रम-णिज्जाओज्ज-गेज्ज-पउरनड-नट्टक-जल्ल-मल्ल-मुट्ठिक-वेलंबग-कहग-पवग-लासग-आइक्खग-लंख-मंख-तूणइल्ल-तुंबवीणिय-तालायर-पकरणाणि य बहूणि महुरसर-गीत-सुस्सराइं अण्णाणि य एवमाइयाइं तव-संजम-बंभचेर-घातोवधातियाइं अनुचरमाणेण बंभचेरं न ताइं समणेणं लब्भा दट्ठुं न कहेउं नवि सुमरिउं जे एवं पुव्वरयपुव्वकीलियविरतिसमितिजोगेणं जाव बंभचेरगुत्ते ।

पंचमगं-आहारपणीय-निद्धभोयण-विवज्जए संजते सुसाहू ववगयखीर-दहि-सप्पि-नवनीय-तेल्ल-गुल-खंड-मच्छंडिक-महु-मज्ज-मंस-खज्जक-विगति-परिचत-कयाहारे न दप्पणं न बहुसो न नितिकं न सायसूपाहिकं न खद्धं तहा भोत्तव्वं जह से जायामाता य भवति न य भवति विब्भमो भंसणा य धम्म-स्स एवं पणीयाहारविरतिसमितिजोगेणं जाव बंभचेरगुत्ते

एवमिणं संवरस्स दारं सम्मं संवरियं होइ सुप्पणिहितं इमेहिं पंचहिं वि कारणेहिं मण-वयण-काय-परिर-क्खिएहिं निच्चं आमरणंतं च एस जोगो नेयव्वो धितिमता मतिमता अणासवो अकलुसो अच्छिद्धो अपरि-स्सावी असंकिलिद्धो सुद्धो सव्वजिणमणुण्णाओ एवं चउत्थं संवरदारं जहा- पढमं जाव समत्तं त्ति बेमि ।

◦ बीए सुयक्खंधे नवमं अज्झयणं/चउत्थं संवरं दारं समत्तं ◦

◦ मुनि दीपरत्नसागरेण संशोधितः सम्पादितश्च नवमं अज्झयणं समत्तं ◦

◦ दसमं अज्झयणं/पंचमं संवरदारं ◦

[४४] जंबू! अपरिग्गहो संवुडे य समणे आरंभ-परिग्गहातो विरते विरते कोहमाणमायालोभा एगे असंजमे दो चेव राग-दोसा तिण्णि य दंडा गारवा य गुत्तीओ तिण्णि य विराहणाओ चत्तारि कसाया झाणा सण्णा विकहा तहा य हुंति चउरो पंच य किरियाओ समिति-इंदिय-महव्वयाइं च छज्जीवनिकाया छच्च लेसाओ सत्त भया अट्ठ य मया नव चेव य बंभचेरगुत्ती दसप्पकारे य समणधम्ममे एक्कारस य उवासगाणं बारस य भिक्खुपडिमा किरियाणा य भूयगामा परमाधम्मिया गाहासोलसया असंजम-अबंभ-णाय-असमाहिठाणा सबला परिसहा सूयगडज्झयण-देव-भावण-उद्देस-गुण-पकप्प-पावसुत-मोहणिज्जे सिद्धातिगुणा य जोगसंगहे सुरिंदा तेत्तीसा आसातणा विरतीपणिहीसु अविरतीसु य एवमादिसु बहूसु ठाणेसु जिणपसत्थेसु अवितहेसु सासयभावेसु अवट्ठिएसु संकं कंखं निराकरेत्ता सद्धते सासणं भगवतो अणियाणे अगारवे अलुद्धे अमूढमण-वयण-कायगुत्ते ।

[४५] जो सो वीरवरवयणविरतिपवित्थर-बहुविहप्पकारो सम्मत्तविसुद्धमूलो धितिकंदो विणय-वेइओ निग्गततिलोक्कविपुलजसनिचिपीणपीवरसुजातखंधो पंचमहव्वयविसालसालो भावणतयंत-ज्झाण-सुभजोग-नाण-पल्लववरं कुरधरो बहुगुणकुसुमसमिद्धो सीलसुगंधो अणहयफलो पुणो य मोक्खवर-बीजसारो

सुयक्खंधो-२, अज्झयणं-१०

मंदरगिरि-सिहरचूलिका इव इमस्स मोक्खवर-मोत्तिमग्गस्स सिहरभूओ संवरवरपायवो चरिमं संवरदारं ।

जत्थ न कप्पइ गामागर-जाव पट्टणासमगयं च किचिं अप्पं व बहुं व अणुं व थूलं व तस-थावरकाय-दव्वजायं मणसावि परिधेत्तुं न हिरण्ण-सुवण्ण-खेत्त-वत्थु न दासी-दास-भयक-पेस-हय-गय-गवेलगं व न जाण-जुग्गसयणासणाइं न छत्तकं न कुंडिया न उवाणहा न पेहुण-वीयण-तालियंटका न यावि अय-तउय-तंब-सीसक-कंस-रयत-जातरूव-मणि-मुत्ताधारपुडक-संख-दंतमणि-सिंग-सेल-काय-वइर-चेल-चम्म-पत्ताइं महारिहाइं परस्स अज्झोववायलोभजणणाइं परियइंढिउं गुणवओ न यावि पुप्फ-फल-कंद-मूलादियाइं सणसत्तरसाइं सव्वधण्णाइं तिहिं वि जोगेहिं परिधेत्तुं ओसहभेसज्जभोयणद्वाए संजएणं किं कारणं?

अपरिमितनाण-दंसणधरेहिं सील गुण-विणय-तव-संजमनायकेहिं तिथ्यरेहिं सव्वजग-जीव-वच्छलेहिं तिलोय-महिएहिं जिणवरिंदेहिं एस जोणी जगाणइं दिट्ठा न कप्पत्ते जोणिसमुच्छेदोत्ति तेणं वज्जंति समणसीहा, जंपि य ओदण-कुम्मास-गंज-तप्पण-मंथु-भुज्जिय-पल्ल-सूप-सक्कुलि-वेढिम-वरसरक-चुण्ण-कोसग-पिंड-सिहरिणि-वट्ठ मोयग-खीर-दहि-सप्पि-नव-नीत-तेल्ल-गुड-खड-मच्छंडिय-मधु-मज्ज-मंस-खज्जक वंजणविधिमादिकं पणीयं उवस्सए परघरे व रण्णे न कप्पति तंपि सण्णिहिं कारुण सुविहियाणं जंपि य उद्धि-ठविय-रचितग-पज्जवजात-पकिण्ण-पाउकरण-पामिच्चं मीसक कीयकडपाहुडं वा जदाणट्ठ-पुन्नपगडं समण-वणीमगट्ठयाए व कयं पच्छाकम्मं पुरेकम्मं नितिकं मक्खियं अतिरित्तं मोहरं चेव संयगामाहडं मट्ठिओवलित्तं अच्छेज्जं चेव अणीसट्ठं जं तं तिहीसु जण्णेसु ऊससेसु य अंतो व्व बहिं य

होज्ज समणद्वयाए ठवियं हिंसा-सावज्ज-संपउत्तं न कप्पति तंपि य परिधेत्तुं, अह केरिसयं पुणाइ कप्पति?

जं तं एक्कारसपिंडवायसुद्धं किणण-हणण-पयण-कयकारि-याणुमोयण-नवकोडीगहिं सुपरिसुद्धं दसहिं य दोसेहिं विप्पमुक्कं उग्गम-उप्पायणेसणासुद्धं ववगय-चुय-चइय-चत्तदेहिं च फासुयं च ववगयसंजो-गमणिंगालं विगयधूमं छद्वाण-निमित्तंछक्काय-परिरक्खणद्वा हणिं हणिं फासुकेणं भिक्खेण वट्टियव्वं, जंपि य समणस्स सुविहियस्स उ रोगायंके बहुप्पकारंमि समुप्पण्णे वाताहिक पित्तसिंभाइरित्तकुविय-तहसण्णिवाय-जाते उदयपत्ते इउज्जल-बल-विउल-तिउल-कक्खड-पगाढ-दुक्खे असुभ-कडुय-फरुस-चंडफलवि-वागे महब्भये जीवियंत-करणं सव्वसरीर-परितावणकरे न कप्पति तारिसे वि तह अप्पणो परस्स वा ओसह-भेसज्जं भत्त-पाणं च तंपि सण्णिहिकयं जंपि य समणस्स सुविहियस्स तु पडिग्गहधारिस्स भवति भायण-भंडोवहि उवगरणं पडिग्गहो पायबंधणं पायकेसरिया पायठवणं च पडलाइं तिण्णेव रयत्ताणं च गोच्छओ तिण्णेव य पच्छाका रओहरण-चोलपट्टक-मुहणंतकमादीयं एयं पि य संजमस्स उववूह-णद्वयाए वायायव-दंस-मसग-सीय-परिरक्खणद्वायए उवगरणं रागदोसरहियं परिहरियव्वं संजएण निच्चं पडिलेहण-पप्फोडण-पमज्जणाए अहो य राओ य अप्पमत्तण होइ सततं निक्खिवियव्वं च गिण्हियव्वं च भायण-भंडोवहि-उवगरणं।

एवं से संजते विमुत्ते निस्संगे निप्पिरिग्गहरुई निम्ममे निन्नेह-बंधणे सव्वपाव विरते वासीचंदण-समाणकप्पे सम-तिण-मणि-मुत्त-लेदु-कंचण-समे समे य माणावमाणणाए समियरए समित-रागदोसे समिए समितीसु सम्मदिट्ठी समे य जे सव्वपाणभूतेसु से हु समणे सुयधारते उज्जुए संजत्ते स साहू सरणं सव्वभूयाणं सव्वजगवच्छले सच्चभासके य संसारंते ठिते य संसारसमुच्छिण्णे सततं मरणाणु-पारए पारगे य सव्वेसिं संसयाणं पवयणमायाहिं अट्ठहिं अट्ठकम्मगंठीविमोयके अट्ठमयमहणे ससमय-सुयक्खंधो-२, अज्झयणं-१०

कुसले य भवति सुह-दुक्ख-निव्वि-सेसे अब्भितर-बाहिरंमि सया तवोवहाणंमि य सुदुजुत्ते खंते दंते य हियनिरते ईरियासमिते जाव परिद्वावणियासमिते मणगुत्ते वइगुत्ते कायगुत्ते गुत्तिंदिए गुत्तबंधयारिं चाई लज्जू धन्ने तवस्सी खंतिखमे जित्तिंदिए सोधिअणिआणे अबहिल्लेस्से अममे अंकिचणे छिन्नगंधे निरुवलेवे ।

सुविमल-वरकंसभायणं व मुक्कतोए संखे विव निरंगणे विगय-राग-दोस-मोहे कुम्मो व इंदिएसु गुत्ते जच्चकंचणं व जायरूवे पुक्खरपत्तं व निरुवलेवे चंदो इव सोमभावयाए सूरु व्व दित्ततेए अचले ह मंदरे गिरिवरे अक्खोभे सागरो व्व थिमिए पुढीवीए सव्वफाससहे तवसावि य भासरासिछन्ने व्व जाततेए जलियहुयासणो विव तेयसा जलंते गोसीसचंदणं पिव सीयले सुगंधे य हरयो वि समियभावे उग्घसिय सुनिम्मलं व आयंसमंडलतलं पागडभावेण सुद्धभावे सौंडरे कुंजरे व्व वसभे व्व जायथामे सीहे वा जहा- मिगाहिवे होति दुप्पधरिसे सारयसलिलं व सुद्धहियए भारंडे चेव अप्पमत्ते खग्गिविसाणं व एगजाते खाणुं चेव उड्ढकाए सुन्नगारे व्व अप्पडिकम्मे सुन्नागारावणस्संतो निवायसरणप्पदीवज्झाणमिव निप्पकंपे जहा- खुरो चेव एगधारे जहा अही चेव एगदिट्ठी आगासं चेव निरालंबे विहगे विव सव्वओ विप्पमुक्के कय-परनिलये जहा- चेव उरए अपडिबद्धे अनिलो व्व जीवो व्व अप्पडिहयगती ।

गामेगामे एगरायं नगरे-नगरे य पंचरायं दूइज्जंते य जित्तिंदिए जितपरीसहे निब्भए विऊ सच्चित्ताचित्त-मीसकेहिं दव्वेहिं विरायं गते संचयातो विरए मुत्ते लहुके निरवकंधे

जीवियमरणासविप्पमुक्के निस्संधि निव्वणं चरित्तं धीरे काएण फासयंते सततं अज्झप्पझाणजुत्ते निहुए एगे चरेज्ज धम्मं इमं च परिग्गहवेरमण-परिक्खणद्वयाए पायणं भगवया सुकहियं अत्तहियं पेच्चाभाविकं आगमेसिभद्वं सुद्वं नेयाउयं अकुडिलं अनुत्तरं सव्वदुक्खपावाण विओसमणं तस्स इमा पंचभावणाओ चरिमस्स वयस्स होंति परिग्गहवेरमण-रक्खणद्वयाए ।

पढमं-सोइंदिएण सोच्चा सद्दाइं मणुण्ण-भद्दगाइं किं ते? वरमुरय-मुइंग-पणव-ददुर-कच्छमि-वीणा-विपंची-वल्लयि-वद्धीसक-सुधोस-नंदि-सूसरपरिवादिणी-वेस-तूणक-पव्वक-तंती-तल-ताल-तुडियानिग्गधो-स-गीयवाइयाइं नडनट्टक-जल्ल-मल्ल-मुट्टिक-वेल्ल-बक-कहक-पवक-लासग-आइक्खकलंख-मंख-तूणइल्ल-तंबुवीणिय-तालायर-पकरणाणि य बहूणि महुस-गीत-सुस्सराइं कंची-मेहला-कलाव-पतरक-पहेरक-पायजालग-घंटिय-खिंखिणि-रयणोरूजालय-छुद्धिय-नेउर-चलणमालिय-कणगनियल-जालग-भूसणसद्दाणिती-लचंक-म्ममाणाणुदीरियाइं तरुणीजणहसिय-भणिय-कलरिभित्त-मंजुलाइं गुणयणाणि य बहूणि महुसजण-भासियाइं अण्णेसु य एवमादिएसु सद्देसु मणुण्णभद्दएसु ण तेसु समणेण सज्जियव्वं न रज्जियव्वं न गिज्झियव्वं न मुज्झियव्वं न विणिग्गयायं आवज्जियव्वं न लुभियव्वं न तुसियव्वं न हसियव्वं न सइं च मइं च तत्थ कुज्जा,

पुणरवि सोइंदिएण सोच्चा सद्दाइं अमणुण्ण-पावकाइं किं ते? अक्कोस-फरुस-खिंसण-अवमाणण-तज्जण-निब्भंछण-जित्तवयण-तासण-उक्कज्जिय-रुण्ण-रडिय-कंदिय-निग्गुद्धरसिय-कलुणविल-वियाइं अण्णेसु य एवमादिएसु सद्देसु अमणुण्ण-पावएसु न तेसु समणेणं रुसियव्वं न हीलियव्वं न निंदियव्वं न खिंसियव्वं न छिंदियव्वं न भिंदियव्वं न वहेयव्वं न दुग्गुंछावत्तिया व लब्भा उप्पाएउं एवं सोत्तिंदि-यभावणाभावितो भवति अंतरप्पा मणुण्णाऽमणुण्ण-सुब्भि-दुब्भि-रागदोस-पणिहियप्पा साहू मण-वयण-कायगुत्ते संवुडे पणिहित्तिंदिए चरेज्ज धम्मं ।

सुयक्खंधो-२, अज्झयणं-१०

बितियं-चक्खुइंदिएण पासिय रूवाणि मणुण्णाइं भद्दकाइं सचिताऽचित्तमीसकाइं-कट्ठे पोत्थे य चित्तकम्मे लेप्पकम्मे सेले य दंतकम्मे य पंचहिं वण्णेहिं अणेगसंठाणं-संठियाइं गंधिम-वेढिम-पूरिम-संघातिमाणि य मल्लाइं बहुविहाणि य अहियं नयणमणसुहकराइं वणसंडे पव्वते य गामागरनगराणि य खुद्धिय-पुक्खरणि-वावी-दीहिय-गुंजालिय-सरसरपंतिय-सागर-बिलपंतिय-खातिय-नदि-सर-तलाग-वप्पिणी फुल्लुप्पल-पउम-परिमंडियाभिरामे अणेगस-उणगण-मिहुणविचरिए वरमंडव-विविहभ-वण-तोरण-चेतिय-देवकुल-सभप्पवावसह-सुकुयसयणासण-सीय-रह-सगड-जाणजुग्ग-संदण-नरनारिगणे य सोमपडिरूवदरि-सणिज्जे अलंकियविभूसए पुव्वकयतवप्पभावसोहग्गसंपउत्ते नड-नट्टग-जल्ल-मल्ल-मुट्टिय-वेल्लबग-कहक-पवग-लासग-आइक्खग-लंख-मंख-तूणइल्ल-तुंबवीणिय-तालार-पकरणाणि य बहूणि सुकरणाणि अण्णेसु य एवमादिएसु रूवेसु मणुण्ण-भद्दएसु न तेसु समणेण सज्जियव्वं जाव न हसियव्वं न सइं च मइं च तत्थ कुज्जा ।

पुणरवि चक्खिंदिएण पासिय रूवाइं अमणुण्ण-पावकाइं किं ते? गंडि-कोट्टिक-कुणि-उदरि-कच्छुल्ल-पइल्ल-कुज्ज-पंगुल-वामण-अंधिल्लग-एग-चक्खुविणिहय-सप्पिसल्लग-वाहिरोगपीलियं विगयाणि य मयक-कलेवराणि सकिमिणकुहियं च दलव्वरासिं अण्णेसु य एवमादिएसु अमणुण्ण-पावतेसु न तेसु समणेणं रुसियव्वं जाव न दुग्गुंछावत्तिया व लब्भा उप्पातेउं एवं चक्खिंदियभावणा-भावितो भवति अंतरप्पा जाव चरेज्ज धम्मं ।

ततियं-घाणिंदिएण अग्घाइय गंधातिं मणुण्ण-भद्दगाइं किं ते? जलय-थलय-सरसपुप्फ-लपाण-भोयण-कोट्ट-तगर-पत्त-चोय-दमणक-मरुय-एलारस-पिक्कमंसि-गोसीस-सरसपचंदण-कप्पूर-लवंग-अगरु-कुंकुम-कक्कोल-उसीर-सेयचंदण-सुगंध-सारंगजुत्तिवरधूववासे उउय-पिंडिम-निहारिम-गंधिएसु अण्णेसु य एवमादिएसु गंधेसु मणुण्ण-भद्दएसु न तेसु समणेणं सज्जियत्वं जाव न सतिं च मइं च तत्थ कुज्जा

पुणरवि घाणिंदिएणं अग्घाइय गंधाणि अमणुण्ण-पावकाइं किं ते? अहिमड-अस्समड-हत्थिमडगोमड-विग-सुणग-सियला-मणुय-मज्जार-सीह-दीविय-मयकुहियविणट्ठकिविण-बहुदुरभिगंधेसु अण्णेसु य एवमादिएसु गंधेसु अमणुण्ण-पावएसु न तेसु समणेण रुसियत्वं न हीलियत्वं जाव पणिहएंदिए चरेज्ज धम्मं ।

चउत्थं-जिब्भिंदिएण साइए रसाणि उ मणुण्ण भद्दकाइं किं ते? उग्गाहिम-विविहपाण-भोय-ण-गुलकय-खंकय-तेल्लघयकय-भक्खेसु बहु-विहेसु लवणरससंजुत्तेसु महु-मंस-बहुप्पगारमज्जिय-निट्ठाणग-दालियंब-सेहंब-दुद्ध दहिसरय-मज्ज-वरवारुणी-सीहु काविसायणक-साकट्टारस-बहुप्पगारेसु भोयणेसु य मणुण्णवण्ण-गंध-रस-फास-बहुदववसंभितेसु अण्णेसु य एवमादिएसु रसेसु मणुण्णभद्दएसु न तेसु समणेणं जाव न सइं च मइं च तत्थ कुज्जा ।

पुणरवि जिब्भिंदिएण सायिय रसातिं अमणुण्ण-पावगाइं किं ते? अरस-विरस-सीय-लुक्ख-निज्जप्प-पाण-भोयणाइं दोसीण-वावण्ण-कुहिय-पूइय-अमणुण्ण-विणट्ठ-पसूय-बहु-दुब्धिगंधियइं तित्त-कडुय-कसाय-अंबिल-रस-लिंड-नीरसाइं अण्णेसु य एवमाइएसु रसेसु अमणुण्ण पावएसु न तेसु समणेण रुसियत्वं जाव चरेज्ज धम्मं,

पंचमगं-फासिंदिएण फासिय फासायइ मणुण्ण-भद्दकाइं किं ते-दगमंडव-हार-सेयचंदण-सीयल-विमलजल-विविहकुसुमसत्थर-ओसीर-मुत्तिय-मुणाल दोसिणा पेहुणउ-क्खेवग-तालियंट-बीय-गण-सुयक्खंधो-२, अज्झयणं-१०

जणियसुहसीयले य पवणे गिम्हकाले सुहफासणि य बहूणि सयणाणि आसणाणि य पाउरणगुणे य सिसिरकाले अंगार-पतावणा य आयव-निद्ध-मउय-सीय-उसिण-लुहाय य जे उदुसुहफासा अंगसुह-निव्वुइकरा ते अण्णेसु य एवमादिएसु फासेसु मणुण्णभद्दएसु न तेसु समणेण सज्जियत्वं न रज्जियत्वं जाव न हसियत्वं न सतिं च मतिं च तत्थ कुज्जा ।

पुणरवि फासिंदिएणं फासिय फासातिं अमणुण्ण-पावकाइं किं ते? अणेगबंध-वह-तालणंकण-अतिभारा-रोह-णए अंगभंजण-सूर्जनखप्पवेस-गाय-पच्छण-लक्खारस-खारतेल्ल-कलकलंतउ-सीसक-काल-लोहसिंचण-हडि-बं-धण-रज्जु-निगल-संकल-हत्थंडुय-कुंभिपाक-दहण-सीहपुच्छण-उब्बंधण-सूलभेय-गयचल-मण-कर-चर-णक-ण्णनासोड्ढसीसछेयण-जिब्भंछण-वसणनयणहि-ययंत-दंतभंजण-जोत्तलयकसप्पहार-पाद-पणिजाणुपत्थर-निवाय-पीलण-कविकच्छु-अगणि-विच्छुयडक्क-वायात-वंदसमसकनिवाते दुट्ठणिसेज्जा दुनिसीहिया कक्ख-ड-गुरु-सीय-उसिण-लुक्खेसु बहुविहेसु अण्णेसु य एवमाइएसु फासेसु अमणुण्ण-पावकेसु न तेसु समणेणं रुसियत्वं न हीलियत्वं जाव न दुगुंछावत्तियं च लब्भा उपाएउं, एवं फासिंदियभावणा-भावितो भवति अंत-रप्पा मणुण्णामणुण्ण-सुब्धि-दुब्धि-रागदोस-पणिहियप्पा साहू मणवयण-कायगुत्तसंवुडे पणिहितिंदिए चरेज्ज धम्मं ।

एवमिणं संवरस्स दारं सम्मं संवरियं होइ सुप्पणिहियं इमेहिं पंचहिवि कारणेहिं मण-वणय-कायपरिरक्खिएहिं निच्चं आमरणंतं च एस जोगो नेयव्वो धितिमया मतिमया अणावसो अकलुसो अच्छिद्धो

अपरिस्सावी असंकिलिद्धो सुद्धो सव्वजिणमणुण्णातो, एवं पंचमं संवरदारं फासियं पालियं सोहियं तीरियं किट्टियं अणुपालियं आणाए आराहियं भवति, एवं नायमुणिणा भगवया पन्नवियं परुवियं पसिद्धं सिद्धं सिद्धवरसासणतिणं आघवियं सुदे सियं पसत्थं पंचमं संवरदारं समत्तं त्ति बेमि ।

◦ बीए सुयक्खंधे दसमं अज्झयणं/पंचमं संवरदारं समत्तं ◦

मुनि दीपरत्नसागरेण संशोधितः सम्पादितश्च दसमं अज्झयणं समत्तं

[४६] एयाइं वयातिं पंचवि सुव्वय-महव्वयाइं हेउसय-विवित्त-पुक्कलाइं कहिया अरहंतसासणे पंच समासेणं संवरा वित्थरेण उ पणवीसंतिं समियं-सहिय-संवुडे सया जयण-घडण-सुविसुद्ध-दंसणे एए अनुचरिए संजते चरमसरीरधरे भविस्सतीति ।

◦ बीओ सुयक्खंधो समत्तो ◦

[४७] पण्हावागरणाणं एगो सुयक्खंधो दस अज्झयणा एक्कासरगा दससु चेव दिवसेसु उद्धिसिज्जंति एगंतरेसु आयंबिलेसु निरुद्धेसु आउत्तभत्तपाणएणं अंगं जहा- आयारस्स ।

१० पण्हावागरणं-दसमं अंगसुत्तं

मुनि दीपरत्नसागरेण संशोधितः सम्पादितश्च पण्हावागरणं समत्तं